

ꦲꦮꦶꦁꦲꦮꦶꦁ

AWIG - AWIG

ꦢꦺꦱꦩꦠꦥꦺꦠꦁ

DESA ADAT PETANG



ꦢꦺꦱꦥꦺꦠꦁ

DESA PETANG

ꦏꦺꦴꦩꦠꦤꦥꦺꦠꦁ

KECAMATAN PETANG

ꦏꦧꦸꦥꦠꦺꦤ꧀ꦧꦢꦸꦁ

KABUPATEN BADUNG

ꦲꦶꦠꦺꦱꦶ

2018

MURDDHA CITA

OM AWIGHNA MASTU, DESA TATA CARA, OM NAMA SIWAYA.

OM SRI PASUPATASTRA, OM AWIGHNAM ASTU NAMA SWAHA

Mangkana panamaskaraning mami kabeh ri Sang Hyang Parama Wisesa sidha amanggih dirghayusa tan kataman lara wighna pinakang hulun kabeh krama desa adat Petang, putusin panugrahan I krama desa adat Petang, gumawe awig-awig desa adat, desa tatacara, wastu kasidan prayojana mami kabeh kateka tekeng dlaha prasama pada sumungkem mwang amanggehaken kadi lingging awig-awig.

Sembah bhakti miwah pangastawan krama majeng ring paduka Bhatara-Bhatari sasuhunan sami, riantukan wantah malarapan panghyangning kalih paswecan Ida Sang Hyang Widhi Wasa asung kretawaranugraha nresti jagat jangkep rawuhing sadagingnya sami, mawinan wenten kahuripan sakala niskala ring bhuwana agung miwah ring bhuwana alit.

Manut dresta, desane kamanggehang dados pasayuban krama desa rawuhing kulawarga pawonganya sami, mawastu raris desane kamanggehang pinaka pawakan bhuwana agung, pawonganya kamanggehang pinaka pawakan bhuwana alit.

Sotaning pawakan bhuwana agung, desane taler kamanggehang pinaka pawakan bhawa mahurip, sane kacirenin antuk wentene pakilit *tri hita karena* sane tan dados pasahang luwire:

- (1) Parhyangan, inggih punika sahanan parhyangan panyiwian desa, genah ngarcana prabhawan Ida Sang Hyang Widhi Wasa pinaka jiwa pramanan desane.
- (2) Pawongan, inggih punika gebogan krama rawuhing warga desa maka sami pawakan *tri kaya* pinaka bayu pramanan desane, mawinan desane prasida molah maprawretti.
- (3) Palemahan, inggih punika sahananing pakarangan, tegal, carik miwah setra sakakuwuban desa adat, pinaka sthula sariran desane.

Awig-awig puniki ngawit puput kapingarep nemoning dina
Anggara kliwon wuku prangbakat, tang/pang, ping 2, sasih
katiga, Isaka warsa 1940, tanggal 28 Agustus 2018, magenah
ring Bale Desa, Desa Adat Petang.

BANTANG AWIG-AWIG.

MURDDHA CITTA.	1
BANTANG AWIG-AWIG.	3
SARGAH PRATAMA ARAN LAN WAWIDANGAN	5
SARGAH KALIH PAMIKUKUH LAN PATITIS.	5
SARGAH TIGA SUKERTHA TATA AGAMA/PARHYANGAN.	6
Palet 1 Indik Dewa Yajnya.	6
Palet 2 Indik Resi Yajnya.	15
Palet 3 Indik Pitra Yajnya.	16
Palet 4 Indik Manusa Yajnya.	26
Palet 5 Indik Bhuta Yajnya.	26
SARGAH PATPAT SUKERTHA TATA PAWONGAN	28
Palet 1 Indik Krama.	28
Palet 2 Pamucuk Desa.	36
Palet 3 Indik Kulkul.	42
Palet 4 Indik Paruman	43
Palet 5 Indik Druwen Desa.	45
Palet 6 Panyanggran Banjar.	46
Palet 7 Indik Pawiwahan.	47
Palet 8 Indik Nyapian.	52
Palet 9 Indik Santana.	55
Palet 10 Indik Warisan.	57
SARGAH LIMA SUKERTHA TATA PALEMAHAN	61
Palet 1 Indik Karang, Tegal, lan Carik.	61
Palet 2 Indik Setra.	64

Palet 3	Indik Papayonan.	65
Palet 4	Indik Wawalungan	66
Palet 5	Indik Wawangunan	69
Palet 6	Karesikan Desa Adat	70

SARGAH NEMNEM WICARA, BHAYA, DUSTA LAN PAMIDANDA

Palet 1	Indik Wicara.	71
Palet 2	Indik Bhaya lan Dusta.	73
Palet 3	Indik Pamidanda.	76

SARGAH PITU NGUWAH NGUWUHIN AWIG-AWIG	76
SARGAH KUTUS SAMAPTA.	77

SARGAH PRATAMA
ARAN LAN WAWIDANGAN DESA
Pawos 1

- (1) Desa Adat puniki mawasta Desa Adat Petang;
- (2) Jimbar kakuwub wawidangania, mawates nyatur inggih punika :
 - ha. Sisi wetan/kangin ring tukad ayung;
 - na. Sisi kidul/kelod ring subak panglumbaran;
 - ca. Sisi kulon/kawuh ring tukad penet;
 - ra. Sisi lor/kaja ring subak abian sida karya;
- (3) Desa adat puniki kawangun antuk karang desa utawi gebogan krama , turmaning kepah dados 66 paon;
- (4) Karang kawis, kepah dados 3 (tiga) Banjar Adat luire :
 - ha. Banjar Adat Petang Kaja;
 - na. Banjar Adat Petang Tengah;
 - ca. Banjar Adat Petang Kelod;
- (5) Wates wawidangan palemahan banjare kamanggehang antuk paruman desane;

SARGAH KALIH
PAMIKUKUH LAN PATITIS
Pawos 2

Desa Adat Petang ngamanggehang pamikukuh mikadi ring sor :

- (1) Pancasila.
- (2) Undang – Undang Dasar 1945;
- (3) Tri Hita Karana manut sada cara Agama Hindu;
- (4) Hak Azasi manusia utawi HAM;
- (5) Uger – uger saking guru wisesa indik desa adat;

Pawos 3

Luwir Patitis Desa Adat Petang makadi ring sor :

- (1) Mikukuhin miwah ngajegang Agama Hindu;
- (2) Ngutamayang utawi nginggilan tata prawertine magama;
- (3) Ngrajegang kasukertan desa saha pawongania sekala lan niskala;
- (4) Ngajegang kasukertan druwen desa;
- (5) Sutindih ring desa adat miwah agama Hindu;
- (6) Ngajegang adat-istiadat, dresta (catur dresta) miwah budhaya Bali sane kapramananin olih Agama Hindu;

SARGAH TIGA

SUKERTA TATA AGAMA/PARHYANGAN

Palet 1

Indik Dewa Yajnya

Pawos 4

- (1) Pura panyiwian sawidangan desa adat Petang luwire :
 - ha. Pura Dhang Kahyangan Pucak Tedung;
 - na. Kahyangan Tiga (Pura Desa/Bale Agung, Pura Puseh, Pura Dalem) lan Pura Prajapati;
 - ca. Pura Alit lan Pura Tegal Suci;
 - ra. Pura Pucak Manik, pura Pucak Manik Galih, pura Pucak Manik Sari, pura Taman Biji;

- ka. Pura Malanting ring soang- soang banjar adat miwah pura Malanting Desa desa adat Petang lan pura Malanting pasar Petang;
 - da. Pura Pamaksan Penataran Sari, pura Pamaksan Batur Sari, pura Pamaksan Pucak Ulangun;
 - ta. Pura Subak Panglumbaran, pura Subak Abian Sida Karya;
- (2) Dina piodalan soang-soang kahyangan inucap kadi ring sor :
- ha. Pura Dhang Kahyangan Pucak Tedung rmemoning dina Saniscara Kliwon wuku Krulut;
 - na. Ring Kahyangan Tiga luire :
 - 1) Pura Desa/Bale Agung rikala dina Buda Kliwon' wuku Dunggulan;
 - 2) Pura Puseh rikala dina Anggara Kliwon wuku Julungwangi;
 - 3) Pura Dalem rikala dina Buda Wage wuku Merakih;
 - 4) Pura Prajapati rikala dina Saniscara Kliwon wuku Wayang;
 - ca. Ring pura Pucak Manik, pura Pucak Manik Galih, pura Pucak Manik Sari lan ring Pura Taman Beji rikala dina Buda Umanis wuku Julungwangi;
 - ra. Pura Malanting Desa Adat lan pura Malanting LPD, rikala dina Buda Wage wuku Klau, ring soang-soang pura Malanting banjar adat rikala saniscara kliwon wuku wariga;
 - ka. Pura pamaksan panataran sari rikala dina Buda Kliwon wuku Ugu, pura pamaksan Batur Sari rikala dina Buda Wage wuku Kelau, pura Pucak Ulangun , rikala dina Buda Kliwon wuku Sinta;
 - da. Pura Ulun Subak Panglumbaran rikala dina Sukra Umanis wuku Klau, Pura Subak Abian Sida Karya rikala dina Saniscara Kliwon wuku Wariga;

(3) Pangaci ring pura inucap manut kecap sastra agama, saha kalaksanayang nista, madhya lan utama. upacaranya wenten 2 soroh :

ha. Ngerainin, mapiteges dina kawit panumayan pangenteg linggih soang-soang kahyangan sane kawentenang nyabran ngasasih;

na. Piodalan utawi patirthan utawi pujawali sane kawentenang nyabran nganem sasih ngimbang pisan prade galah nangsek wiadin nganut paetangan sasih, luire :

- 1) Linggih madatengan mungguh tatebasan mertha sari, riantukan galah nangsek, mapiteges odalan puyung utawi odalan alit;
- 2) Pulasari saha babangkit siki, odalan nemoning sasih kapat utawi kadasa;
- 3) Majaba jero, ritatkala odalan nuju purnama utawi tilem;
- 4) Nyatur, odalan nuju purnamaning kapat utawi kadasa;
- 5) Ngusaba Desa, nganut paetangan saha kamanggehang manut pararem;
- 6) Sajeroning panyepian prade wenten piodalan, upacara luput saking pamidanda risampune nunas panugrahan rihin ring prajuru desa adat, tur sakalwiring upacara inucap mangda kamargiang sakantun rahina lan tanpa dupa tur nenten nyuarayang kulku wiadin gambelan;

na. Sajawaning rerainan utawi piodalan-piodalan ring pura kahyangan inucap ring ajeng krama sami patut ngalaksanayang pangastawan ring Ida Hyang Widhi saha prabhawan Ida napkala dina suci makadi ring sor:

- 1) Siwaratri, mapiteges masambang samadhi pangak-saman ring Ida Hyang Widhi, mungging kawidian krama soang-soang, patut kalaksanayang awengi rikala purwanining tilem kapitu, kadulurin antuk ngawacen pustaka suci indik siwaratri miwah sane tiosan;
- 2) Piodalan Sanghyang Aji Saraswati pinaka dina pangastawan Ida Hyang Widhi Wasa rikala ngalugrayang pangawruhan ring soang-soang krama desa, panumayan dinane, saniscara umanis wuku watugunung nyabran ngenem sasih (210) dina, patut masambang samadhi, tur ngelarang tapa brata jantos dina benjang ne, nunas banyu pangawruh (kewastanin banyu pinaruh);
- 3) Pagerwesi pinaka dina pangastawan Ida Hyang Widhi Wasa sane maprabhawa Hyang Pramesti Guru rikala ngayogoyang karahajengan *tribuana* kasarengin antuk dewa-dewi miwah pithara-pithari, krama patut taler nyuciang angga sarira pinaka panatak sunaran kasucian payogan Ida Bhatara, prasida rahajeng bhuwana alit miwah krama soang-soang, panumayan dina Buda Kliwon Sinta, nyabran nganem sasih;
- 4) Galungan inggih punika, parimba paperang an dharma kalawan adharma, punika awinan ngawit saking redite pahing dunggulan sampun mungging kala tigane, rahina galungan mapiteges pangastawa suksmaning idhep soang-soang krama desa ring kawentenan *tri buana (jagat raya)* rawuhing upa renggannya olih Ida Hyang Widhi. Panumayan dinane, Buda Kliwon Dunggulan nyabran nganem

- sasih patut nanceb penjor, panyuksma ring kagenahang rupakan pasuwecan Ida Hyang Widhi;
- 5) Ngadasa dina riwusan galungan rikala saniscara Kliwon wuku Kuningan mapiteges pangaluwuran Ida Hyang Widhi kairing antuk dewata kabeh miwah putra-putri, krama desane patut ngastawayang kasentosan, kadirghayusan saha pamitan wahya dyatmika ring Ida Hyang Widhi Wasa;
 - 6) Nyabran saniscara kliwon kawastanin tumpek makadi, tumpek landep, tumpek wariga, tumpek kuningan, tumpek krulut, tumpek uye miwah, tumpek wayang, soang-soang tumpek panemayan, nya nyabran ngenem sasih, kasuksman nyane makadi ring sor :
 - ha) Tumpek Landep mapiteges, pangastawan Ida Hyang Widhi, rikala Ida nganugraha ring sakancaning lalandep sane marupa sanjata keris, tumbak, tamyang, cakra lan sakancanipun;
 - na) Tumpek Wariga, mapiteges pangastawan Ida Hyang Widhi Wasa majeng ring kawredyan sahananing tanem tuwuh;
 - ca) Tumpek Uye, pangastawan Ida Hyang Widhi ring kerahajengan sarwa wawalungan;
 - ra) Tumpek Wayang, pangastawan Ida Hyang Widhi, rikala maprabhawa bhatara Iswara;
 - 7) Purnama, pangastawan Ida Hyang Widhi rikala maprabhawa Hyang Candra Ratih;
 - 8) Tilem, pangastawan Ida Hyang Widhi, rikala maprabhawa hyang siwa raditya;
- (4) Pangempon soang-soang pura manut dresta kadi ring sor;

- ha. Pura Dhang Kahyangan Pucak Tedung, kaempon olih krama desa adat Petang kasarengin antuk krama desa adat sane mawiwit saking 8 (kutus) desa adat inggih punika desa adat Petang, desa adat Kerta, desa adat Sulangai, desa adat Lipah, desa adat Munduk Damping, desa adat Angantiga, desa adat Sandakan, desa adat Batu lantang;
- na. Pura Desa (Bale Agung), pura Puseh, pura Dalem pura Prajapati, pura Alit lan pura Tegal Suci kaempon olih 3 (tiga) banjar, saha magilir nyabran nganem sasih tur kaenter olih bandesa adat;
- ca. Pura Pucak Manik, pura Pucak Manik Galih lan pura Taman Biji, kaempon olih krama desa pangarep, krama desa adat siosan nyarengin pinaka panyiwu;
- ra. Pura Malanting desa adat lan pura Malanting LPD kaempon olih krama desa adat Petang, lan pura malanting ring soang-soang banjar adat kaempon olih soang-soang banjar adat inucap;
- ka. Pura Pamaksan Panataran Sari kaempon olih pamaksan pura panataran sari, lan pura panataran batur sari kaempon olih pamaksan pura batur sari;
- da. Pura Subak Panglumbaran kaempon antuk krama sane madruwe pasawahan ring wawidangan desa adat Petang;
- ta. Pura Subak Abian Sida Karya, kaempon antuk krama sane madruwe panegalan ring wawidangan desa adat inucap;

Pawos 5

- (1) Ring soang-soang pura inucap kawentenang pamangku;
- (2) Ngadegang pamangku manut dudonan makadi ring sor :
 - ha. Nyanjan utawi masemburang soang-soang mapiteges mapinunas ring ajeng palinggih pura inucap, manawi ring balian sonteng lan sapanunggilan ipun;
 - na. Turunan utawi ngawaris;
 - ca. Kacatri, kapilih, olih krama desa;
- (3) Tan wenang kaanggen pamangku, luwire :
 - ha. Cedangga luwire peceng, perot, cungh lan sapanunggilan ipun sane mawit saking palekadan;
 - na. Sang sapisira ugi sane tan kepatutan manut pararem;
 - ca. Sungkan ila, ayan, buduh wiadin edan;
 - ra. Sane madruwe kasucian urip tan becik;
- (4) Prabya Kapemangkuan :
 - ha. Ngawintenin pamangku kamedalang saha kalaksanayang antuk sang ngadegang, makadi krama desa, utawi pangempon pura soang-soang;
 - na. Pitra Yajnya riwekas prade kulawarga pamangku tan mrasidayang, patut kasungkemin antuk krama desa, utawi pangempon pura, sanisthane brahma prayascitta manut pararem;
- (5) Pamangku patut ngamanggehang sasananing pamangku luwire tan wenang ajejuden miwah sane siosan;

Pawos 6

- (1) Swadarmaning pamangku luwire :
 - ha. Ngenterang upacara piodalan ring kahyangan desa utawi ring soang-soang pakubon krama;

- na. Tan wenang salab sulub, yan mamurug wenang pamangku inucap nyepuh raga;
 - ca. Prade silih sinunggil pamangku kapialang utawi cuntaka, kengin nyelang pamangku siosan utawi nuwur sang sulinggih;
 - ra. Samalih yan sampun pamangku ngayah tigang dina ring pura, kancit wenten kulawargania lampus , pamangku inucap tan keneng cuntaka sakewanten pemangku tan budal salami piodalan;
- (2) Patias utawi olih-olihan pamangku luwire :
- ha. Panyolasan miwah sarin canang;
 - na. Upon-upon palabha carik miwah tegal manut pararem;
 - ca. Luput pakaryan lan rerampen utawi reramon, nanging padagingan keni kadi patut;

Pawos 7

- (1) Pamangku kagentosin sangkaning :
- ha. Lampus utawi seda;
 - na. Pinunas ngraga manawi kageringan lan sapatunggilan ipun;
 - ca. Kawusan antuk krama manawi malaksana sane tan patut (asta dusta);
- (2) Prade pamangku kawusang sangkaning malaksana asta dusta, keni pamidanda manut pararem saha ngawaliang prabya pawintenan pecak;

Pawos 8

Kasukerthan Kahyangan

- (1) Sane nenten kalugra ngaranjing kapura luwire :
- ha. Sang katiben cuntaka makadi sebel raga :
 - 1) Sebel kandel, ngrajaswala, salami dereng mabersih;

- 2) Sebel madruwe putra, sajeroning tigang sasih sane istri, sane lanang roras dina;
 - 3) Sebel pangantenan, sadurung mabyakala;
 - 4) Sebel sangkaning kapademan manut sengker;
- na. Sang kapatita utawi sane kasungguh panak babinjat;
- ca. Makta sahananing sane kasinanggeh ngaletihin;
- ra. Wewalungan suku pat, sajawaning rikala mapepada;
- ka. Mabusana sane tan manut kadi tatacaraning kapura;
- da. Anak alit sadurung mayusa tigang sasih;
- ta. Sadurung polih wak-wakan (pituduh) prajuru desa adat;
- (2) Busana ngaranjing kapura wenang nganutin dresta minakadi ring sor :
- ha. Ritatkala ngaturang ayah, mawastra lan nyelempot;
- na. Ritatkala ngaturang bhakti (muspa) mabusana jangkep;
- ca. Busana ngaranjing kapura napkala ngaturang bhakti sane istri nenten kadadosang ngangge kuaca kabaya malengen ring siku, patut malengen apagelangan tangan;
- ra. Siosan kadi ring ajeng nenten kalugra sajawaning sampun pituduh prajuru;
- (3) Malaksana sane tan kawenangan ring pura luwire :
- ha. Masuara sane kasinanggeh wak parusya wak capala;
- na. Makoratan utawi mabacin, mawarih, masanggama;
- ca. Masumpah utawi macoran, sajawaning pituduh prajuru desa;
- ra. Ngias raga sajawaning pandita;
- ka. Mungguh tedun ring palinggih sajawaning pituduh prajuru desa;
- (4) Sang mamurug kadi kecape ring ajeng keni pamidanda pamrayascita sapatut nyane;

Pawos 9

- (1) Yan wenten janma karawuhan ring pura, kengin kapintonin, prade rumasa kasumangsayan, yan tan wiakti janma inucap kasisipang manut pararem;
- (2) Prade kahyangan kahanan durmanggala, makadi kapanca bhaya, pamangku pura patut digelis nyadokang ring prajuru mangda marumang krama desa tur ngawentenang upacara sepatutnyane;

Palet 2

Indik Rsi Yadnya

Pawos 10

- (1) Sang pacang madeg pandita utawi sulinggih, saluire jagi ngenterang yajnya patut masadok ring prajuru desa, kalih Parisada Hindu Darma;
- (2) Prajuru desa patut nitenin tur wenang ngalangin, prade wenten pracihna lempas ring kakecap miwah drestane, tur sareng nyaksinin upacara saha nyiarang ring paruman desa tegep rawuhing bhisekan sang sulinggih paican nabennyane;
- (3) Krama desa patut ngaturang ayah sapamadeg miwah ring panglepasan sang sulinggih ring wekas katuntun antuk prajuru desa;

Pawos 11

- (1) Sang sulinggih patut ngarihinan ngayomin yajnya ring wawidangan jagat Petang, sasampune wawu muputang yajnya kajaba jagat, utawi kadura desa;
- (2) Krama desa sami sareng-sareng nitenin katuntun antuk prajuru, mangda sahanan yajnya sane kawentenang kaicen pamuput oleh Pandita utawi sulinggih manut kawenangannya soang-soang;

Palet 3

Indik Pitra Yajnya

Pawos 12

Dudonan pamargin pitra yajnya makadi ring sor :

- (1) Pangupakaran sang lampus;
- (2) Upakara-upacara pitra yajnya riwusan kaabenan mawastu munggah don bingin (ngeroras), risampune wawu kamargiang ngalinggihang dewa hyang (bhatara-bhatari);

Pawos 13

Swadarma lan tategenan krama prade wenten silih tunggil warga lampus:

- (1) Sang kaduhkitan patut :
 - ha. Nyadokang ring kelian desa tur nunas tatimbang ring pamargi salantur ipun;
 - na. Ngaturin krama banjar ngaromba makarya eteh-ete sawa manut dresta saha kaduluring antuk panyembrama canang sakasidan antuk;
- (2) Swadarmaning banjar utawi desa makadi ring sor :
 - ha. Kelian banjar maritatas pamargin sang kaduhkitan, napike pacang kapendem, makingsan rihin utawi lantur kaabenang;
 - na. Prade kapendem, raris kawentenang kulkul patau olih kelian banjar utawi patajuh nyane;
 - ca. Panyanggran banjar salanturnya :
 - 1) Soang-soang krama banjar nedunin patus manut pararem;
 - 2) Ngaromba ngaryanin eteh-ete sawa saha kasareng in antuk krama sane rawuh;
 - 3) Sami krama banjar ngater kesetra jantos pamen-demane puput;

- 4) Tan kengin ngelelet langkungan ring 7 (pitung) dina tur patut polih pagebagan manut paetangan kelian patus utawi banjar;
 - 5) Tan kalugra nginepang bangbang;
- (3) Prade wenten lampus rikala piodalan, kengin mendem tan pasadok tur mamargi wengi (sandikala);

Pawos 14

- (1) Sane kasinanggeh cuntaka sekadi ring sor :
- ha. Cuntaka sangkaning lampus;
 - na. Cuntaka sangkaning ngrajaswala;
 - ca. Cuntaka sangkaning ngembasang putra;
 - ra. Cuntaka sangkaning kruron;
 - ka. Cuntaka sangkaning pawiwahan;
 - da. Cuntaka sangkaning gamia gamana;
 - ta. Cuntaka sangkaning salah timpal/timpah;
 - sa. Cuntaka sangkaning anak istri mobot nenten kaupakara pabiyakawonan tur pawidhi widhanan;
 - wa. Cuntaka sangkaning mamitra ngalang;
 - la. Cuntaka sangkaning wenten anak istri ngawentenan putra sadurunge maupakara pabiyakawonan tur pawidhi widhanan;
- (2) Indik sengker kacuntakan makadi ring sor :
- ha. Cuntaka kalayu sekaran, cuntakannya kantos masapuh-sapuh manut dresta;
 - na. Cuntaka ngrajaswala 3 (tiga) dina ngawit saking ngraja swala utawi salaminya ngrajaswala (ngamedalang rah);
 - ca. Cuntaka ngembasang putra, kepus puser sane lanang lan asambutan sane istri;

- ra. Cuntaka karuron, abulan pitung dina (42 dina) tur sampun matirta prayascitta;
 - ka. Cuntaka pawiwahan, cuntakanya ngantos sasampune kalaksanayang pabiakawonan;
 - da. Cuntaka gamia gamana, cuntakanya ngantos sasampune kapalasang utawi masapihan tur sampun kawentenang pamrayascita desa miwah kahyangan;
 - ta. Cuntaka sangkaning salah timpal/timpah, kapuputang manut kecaping sastra agama Hindu tur dresta miwah adat;
 - sa. Cuntaka anak istri mobot nenten kawentenang upakara pabiakawonan, cuntakanya ngantos kawentenang upacara pabikawonan;
 - wa. Cuntaka mamitra ngalang, cuntakania ngantos kawentenang upacara pabiakawonan;
 - la. Ngembasang putra tan pawidhi widhana, cuntakanya ngantos wenten sane mameras putrane, tur sampun kawentenang upacara manut sastra agama Hindu;
- (3) Cuntaka kalayu sekaran sengkernya :
- ha. Mapendem cuntakanya :
 - 1) Cuntaka utawi sebel banjar rawuhing 3 (tiga) dina riwusan mendem utawi sasampun polih tirtha prasyascita;
 - 2) Kulawarganya sajeroning pakarangan ngantos 12 (roras) dina;
 - na. Ngaben utawi upacara pitra yajnya cuntakanya inggih punika sang nyambut karya pitra yajnya cuntakanya ngawit saking ngarancang (mapangalang sasih) karya rawuh riwus yajnyanya (mapegat);
- (4) Tan keneng cuntaka luire sang sulinggih lan pamangku kahyangan desa;

Pawos 15

- (1) Atiwa-tiwa (pangabenan) kamargiang antuk :
 - ha. Sawa prateka inggih punika upacara pitra yajnya madasar antuk ngupapira sawa (ngupapira sang lampus);
 - na. Sawa resi inggih punika upacara pitra yajnya madasar antuk ngupapira awak-awakan sawa sane marupa sawa karesian;
- (2) Panumaya pangabenan wenten 2 soroh:
 - ha. Ngaben dadakan utawi bah-bangun, kadadosang sajeroning banjar;
 - na. Ngaben ngamasa utawi ngerit/masal;
- (3) Dudonan pangabenan ngawit saking, ngendag, malelet utawi nyiramin, ngeseng ngantos pangiriman utawi nganyut;
- (4) Yan wenten silih tunggil krama lampus utawi padem ngulahpati miwah salahpati, wenang kaupakara sajeroning paumahanya;
- (5) Mungwing pitra yajnyane nganut sengker, wiadin wawu kengin kaabenang risampun upakara ngulahpati utawi salahpati inucap tegap kalaksanayang;

Pawos 16

Papatusan pangabenan wenten 3 (tiga) soroh:

- (1) Papatusan kalaning ngaben alit kadi ring sor puniki :
 - ha. Masadok ring kelian adat indik nunas padewasan pacang muputang karya pangabenan;
 - 1) Ngaturang/mesuang daging patus makadi : tiying, ron, selepan gumanti pacang anggen eteh-ete sawa punika;
 - 2) Pranamyang babanjar sakasidan antuk makadi lanjutan, canang lan sane tiosan kalaning makarya miwah madelokan;

- 3) Tan kengin ma-eboh-ebohan makadi matetampahan prade nenten pranamya ring prabya, sakemawon nenten ngirangin prade sang madruwe karya pikedeh mapaweweh ring warga utawi sang rawuh maka jalaran ngamargiang kerti yasa;
 - 4) Tan kengin ngaturin pangwales antuk isin sok prade nenten mrasidayang;
 - 5) Tan kengin ngaturin rama banjar ajengan kalaning makarya utawi majenukan;
 - 6) Tan wenang nrima tatempungan utawi panyangkingan;
 - 7) Ngaryanin eteh-ete pangleletan saha kalanturang raris antuk pamargi nyiramin sawa;
 - 8) Yan prade majenukan mangda benjang pangutangan;
 - 9) Ngawentenang pagebagan ngawit saking paleletan ngantos tigang rahina risampun pangutangan;
 - 10) Ngamedalang patus manut pararem;
- na. Dharmaning sang nruwenang sawa kalaning ngaben madhya pateh sakadi ha (1) lan (2) kadulurin malih makadi :
- 1) Ngaturin krama banjar mebat, pamucuk ngebatang banjar utawi patus, taler kengin nunas tulung ngebatang tamiu;
 - 2) Ngaturin krama banjar ajengan lanang lan istri apisan ngatik 3;
 - 3) Yan perade wenten sawa utawi watangan langkungan ring adiri sejeroning paumahan, patut malih ngaturin banjar ajengan apisan lanang lan istri, sapunika taler tingkahe yan menerima tatempungan nanging sawa langkungan tan wenang langkungan ring limang diri ;

4) Patut nuwur sang wiku utawi sulinggih;

ca. Swadarmaning banjar kalaning ngaben madia patut maweweh malih :

- 1) Rikala mebat patut ngaturin I banjar minakadi ulam, bakal basa, kelapa, minyak saha saang;
- 2) Ngaryanang bale gong asiki meageng 6 x 4 m, surya asiki, bale pawedan asiki, patulangan keh sawa malih bale salunglung asiki;
- 3) Ngamedalang patus manut pararem;

ra. Darmaning sang nruwenang sawa, kalaning ngaben ageng patch kadi ngaben madya maweweh malih :

- 1) Ajengan lanang istri, ngawit makarya sanganan, ring pabersihan kalih pangutangan utawi palebon, polih ajengan mepek (ping kalih) ngatik 3;
- 2) Yan mehelatan arahina wawu makirim, malih ngaturin I banjar lanang istri ajengan apisan;
- 3) Swadharmaning krama banjar maweweh malih kadi ring sor :

ha) Ngaryanin Bale pabasmian, tarajangan sami masiki, sesalon mageng 6 x 5 m, saha patulangan manut keh sawa sane ngarep (tan patempungan);

na) Ngamedalang patus manut pararem;

ca) Ngamedalang pangerombo ngarereh reramon, miwah ngarombo tukang wadah, keh ipun manut pinunas sang nruwenang karya;

- ra) Yan ana janma saking dura desa nyangking patut keni palaletahan satunggil adiri manut pararem lan patut nawur panukun setra manut pararem;
- (2) Yan prade silih sinunggil krama matempung kadura desa patut ipun keni banten pamiyut saha keni sesari manut pararem;
 - (3) Mungging tata cara ngamedalang sawa utawi layon, mangda kapidabdabang tan patut magujeg saha ngawetuang suara ghora miwah magarap sawa;
 - (4) Yan prade wenten krama sane seda utawi lampus sewosan ring pakubon nyane, minakadi ring dura desa miwah genah lianan patut krama banjare ngarereh sawa punika kabakta budal;
 - (5) Jadma lampus utawi padem salahpati miwah ngulahpati, kengin sawanya kabakta budal tur kaprateka;
 - (6) Miwah yan sawa kantong ring umahnya duaning, kasangkutin antuk dewasa, krama banjar wenang ngamargiang pagebagan kehnya manut paetangan;
 - (7) Padgata kala yan wenten wong dura desa kacunduk padem sejeroning desa adat, mangda Bandesa Adat atur supeksa ring sang ngawarat, saha tan wenang kagingsirang genahnya, keni sampun kapiolasannya ngawetuang kasumangsayan, risampun katureksa antuk sang ngawerat, makadi polisi rawuh kapisum dokter wawu kengin kagingsirang;
 - (8) Yan prade seda utawi padem sangkaning sungkan, manawita kapidabdabang ring kulawargannya sajeroning desa adat puniki, patut kelaran atur supeksa ring prajuru desa inucap.
 - (9) Buat paingkupan babawos ring ajeng prade pacang kapendem wyadin katunjel (brahma prayascita) patut janma ika nganutin palaletahan kadi ring sor :

- ha. Sampun masadok ring prajuru desa;
 - na. Ngaturang pangaci manut tata cara Agama Hindu, nawur panukun setra manut pararem;
- (10) Sajawaning wenten paetangan sewos, dina sane tan wenang mendem utawi ngeseng sawa makadi dina purnama, tilem, prawani, kala gotongan, semut sadulur, dina pepedan, pasah, rerahinan jagat utawi panumaya odalan ring pura utawi kahyangan, nyandung, makirim wangke, nanem utawi ngeseng tiga sapisanan ring setra tunggal;
- (11) Sawa sane patut pendem pramangkin luwir ipun :
- ha. Anak alit durung maketus ;
 - na. Janma padem ngadut manik (beling);
 - ca. Janma padem keni gering agung utawi kalugra taler nunjel utawi ngeseng premangkin;
 - ra. Paetangan sewos inucaping ring ajeng kelaksanayang antuk amandung amawa suar, kakingsanang sawa ika ring setra, tanpa suaran kulkul ring wawu seda utawi padem ngantos mendem sanggahnia saha upakara banten, tanpa gegumuk, maduluran ploncor, mamargi wengi tur makta sundih;
- (12) Mungguwing sajeroning ngamargiang sawa miwah pamen-
deman kadi ring sor :
- ha. Tan wenang ngalangkar watang, mapiteges yan wenten sawa lintangan ring asiki sajeroning babanjaran, ring setra asiki, tur jagi kapendem ring dina tunggal, mangda sawane tampekan ring setra kamargiang rihinan;
 - na. Asapunika taler pemargine ring pangutangan ngaben;

- ca. Mungging pamendeman miwah upacara saji pangiriman sawa punika manut taler sakadi pamargine ring ajeng, inggih punika sadurunge sawa kamargiang rihinan kapendem tur kaupakara saji pangiriman tan kapatutang malih menden sawa utawi tan wenang makirim wangke), risampun kapendem sawa inupakara wawu kengin sawa pungkuran ika kapendem saha inupakara asapunika salantur ipun jantos sawane sami kapendem saha kaupakara;
- ra. Yan prade wenten taler silih tunggil krama jagi ngentas sawa (ngaben) sinarengan kecapin ajeng (ca), pamen- deman sawa kamargiang rihin tan nganutin genah sawa ika, wawu raris kengin kamargiang upakara ngaben;
- ka. Krama banjar utawi desa adat madruwe wawenang nitenin miwah ngamecikang setra sane dados rarempon nya;
- da. Sajawaning ring setra tan pisan kedadosang mendem miwah nunjel sawa;
- ta. Tan wenang nginepang bangbang;
- sa. Rikalaning ngendag tan wenang muat tanah utawi luwun setra kebakta kadesa adat;
- wa. Tan wenang makarya undung-undung utawi rumah kubur sane permanen ring setra krama Hindu;
- la. Janma nandang sungkan ila, gering agung patut kapendem ring genah sane kapituduh olih kelian banjar sareng bandesa adat sajeroning setra;
- ma. Yan wenten silih situnggil krama istri sane mobot tur raris padem utawi lampus patut kabasah, tan kengin kapendem sadereng bobotanya embas;
- ga. Mangda maka sami krama desa adat mrasidayang ngamargiang indik pitra yadnya atiwa-tiwa patut :

- 1) Nyabran 3 (tga) ngantos 5 (lima) warsa kawenten-ang upacara atiwa-tiwa kawastanin ngerit;
 - 2) Upakara kamargiang nginutin dudonan nista madya lan utama;
- ba. Saluwiring janma padem, sajeroning pitung (7) rahina yan pacang keabenang pramangkin tan ngetang dewasa, maupakara agung wiadin alit, nanging padem tan sereh miwah sakit ila;
- nga. Jadma salah pati miwah ngulah pati, sakit ila yan pacang' kaabenang patut kawewehin antuk upakara pangulapan' miwah panebusan;
- pa. Bacakan yusa jadma sane patut kaabenang luwire :
- 1) Yan sampun mayusa 3 (tigang) sasih ngantos durung maketus tan patut kaabenang, patut kaklungahang;
 - 3) Saking maketus selantur ipun patut kaabenang;
- ja. Penyekehan utawi ngalelet sawa luirnia kadi ring sor :
- 1) Yening ngaben alit tan wenang nyekeh langkungan ring awuku;
 - 2) Ngaben madhya tan langkungan ring 6 wuku;
 - 3) Ngaben agung tan langkungan ring 3 sasih;
- ya. Yan wenten janma seda utawi padem manut (pawos 16) ring panegalan miwah sawah lan sane sewosan, patut sang madruwe kepatutan janma padem punika mesapuh-sapuh ring genah lan margi sane kaentasin manut dresta lan pararem;

Palet 4
Indik Manusa Yajnya
Pawos 17

- (1) Manusa yadnya inggih punika upacara dharmaning manusa, ngawit saking kamargiang kramaning mapawarangan rawuh ring kamargiang upacara pawintenan;
- (2) Upakara-upacara manusa yajnya inucap madudonan sakadi ring sor :
 - ha. Upacara magedong-gedongan sasampun bobotane mayusa 6 (nem) sasih;
 - na. Upacara rare medal;
 - ca. Upacara kepus udel;
 - ra. Upacara roras dina;
 - ka. Upacara tutug kambuhan (42 dina);
 - da. Upacara tigang sasih (3 bulan);
 - ta. Upacara pawetuan utawi otonan (6 bulan);
 - sa. Upacara tutug kelih utawi ngerajaswala wadone, ngembakin lanange;
 - wa. Upacara metatah utawi mapandes;
 - la. Upacara pawiwahan;
 - ma. Upacara mawinten;
- (3) Upakara-upacara inucap kalaksanayang nista, madya, utama manut sastra agama saha catur dresta sane ngawinang sima cara desa.

Palet 5
Indik Bhuta Yajnya
Pawos 18

- (1) Bhuta yadnya inggih punika upakara-upacara biakala ring prathiwi lan kahyangan, sarwa prani saha upakara-upacara ring babhutan;

- (2) Upacara pabiakala ring sarwa prani luire :
- ha Upacara sane kamargiang majeng ring sarwa tumuwuh mawasta tumpek pangatag, kalaksanayang ritatkala dina saniscara kliwon wuku wariga;
 - na Upacara sane kamargiang majeng ring sarwa ingon-ingon mawasta tumpek andang, kalaksanayang ritatkala dina Saniscara Kliwon wuku Uye;
 - ca Upacara pakala-kalan ring manusa manut wiguna kabawos pabiakala;
- (3) Upacara pabiakala ring pertiwi, kahyangan lan babutan kewastanin macaru;
- (4) Pecaruan inucap ring ajeng nista, madya, utama manut wiguna kadi ring sor :
- ha. Eka sata;
 - na. Panca sata;
 - ca. Panca sanak;
 - ra. Panca kelud;
 - ka. Resi Gana;
 - da. Balik sumpah;
 - ta. Tawur agung;
- (5) Sajawaning upacara bhuta yajnya makadi ring ajeng, ring desa adat Petang taler kamargiang upacara :
- ha Majot-jotan utawi saiban/banten tugu (yajnya sesa), nyabran wusan maratengan;
 - na Masapuh-sapuh, rikala pacang wali utawi piodalan ring pura utawi genah suci;

Pawos 19

- (1) Nangken ngawarsa rikalaning tilem sasih kasanga kalaksana- yang tawur kasanga, taler kabawos ngarupuk, maka cihna pacang magpag dina panyepian benjangne;

- (2) Sajeroning ngalaksanayang upacara panyepian patut kadulurin antuk ngamargiang catur brata panyepian, sane dudonan ipun makadi ring sor :
- ha. Amati Geni inggih punika tan kengin maapi-api;
 - na. Amati Karya inggih punika tan kengin nyambut karya;
 - ca. Amati lelanguan inggih punika tan kengin maoneng-onengan lan maliang-liang utawi masaneng-senengan, lan sapanunggilan ipun;
 - ra Amati lalungayan inggih punika tan kengin malancaran kantos ngaliwat pamesuan;
- (3) Babrataan inucap kamagiang saking semeng ngantos ngedas lemahang benjangne;
- (4) Sang mamurug kecape ring ajeng patut keni pamidanda manut pararem ring banjar utawi tempekan soang-soang, sane katitenin olih patilik desa (pecalang desa);
- (5) Riwus dina nyepi (benjangne) maka cihna pangawit Isaka warsa anyar, patut soang-soang warga desa sami padha ngaksama (dharma santhi);

SARGAH PATPAT
SUKERTA TATA PAWONGAN

Palet 1

Indik Krama

Pawos 20

- (1) Sane kabawos krama desa inggih punika kulawarga utawi krama sane jumenek ring wawidangan desa Petang;
- (2) Krama desa Petang kabinayang dados 3 (tiga) soroh luire :
- ha. Krama adat inggih punika, krama sane nyarengin adat, magama Hindu, sampun marabian lan tedun mabanjar adat, mipil tur sareng nyungkemin kahyangan tiga desa adat Petang saha sutindih ring kaajegan desa adat Petang;

na. Krama tamiu inggih punika, krama sane mawit saking dura desa adat Petang, sane magama Hindu, nenten mipil sakewanten satinut ring pararem desa adat Petang;

na. Sewosan ring krama inucap, ring desa adat taler wenten kabawos tamiu, inggih punika keluarga sane nenten magama Hindu, wantah sareng nyungkemin ring pawongan lan palemahan desa adat Petang;

Pawos 21

Krama desa adat Petang manut linggihnyane kabinayang dados 6 (nem) soroh:

- (1) Krama ngarep teges ipun krama sane ngamong karang kawis;
- (2) Krama panyade teges ipun janma sane wenten dedandanan waris saking krama ngarep taler kawastanin pangele ngarep;
- (3) Krama pangele teges ipun janma sane madunungan tetep ring krama ngarep wiadin magenah netep sajeroning palemahan inucap wyadin ring dura desa sakemawon kantun wenten pakilitan ipun ring krama ngarep;
- (4) Krama daha teruna inggih punika krama sane mayusa 13 nyantos 30 warsa sane durung marabian;
- (5) Krama datu inggih punika krama sane mayusa lintangan ring 30 (tigang dasa) warsa nenten naenin alaki rabi nyantos lampus;
- (6) Krama Balu inggih punika krama sane katinggalin sangkaning sane istri utawi sane lanang padem utawi nyapian. Krama balu kepah dados 4(petang) soroh:

ha. Balu makrambian inggih punika balu sane sampun maduwe pianak cucu dereng marabian;

- na. Balu ngempu inggih punika balu sane madruwe pianak kantun alit;
- ca. Balu ngatung inggih punika balu sane nenten madruwe pianak utawi santana;
- ra. Balu ngelisting inggih punika balu sane nenten madruwe pianak, artha warisan lan sameton;

Pawos 22

Tata caraning ngranjing dados krama desa :

- (1) Ngawit dados krama desa :
 - ha. Sangkaning ngamong karang kawis;
 - na. Mawiwit pawiwahan;
- (2) Panumaya tedun makrama desa adat :
 - ha. Ngawit tedun makrama desa ngarep nyabran sasih kasanga;
 - na. Yan wenten karang kawis utawi karang desa kepah sane acutak dados kalih utawi langkungan, kulawarga sane nanggap punika patut makrama desa ngarep turmaning kaupasaksi antuk prajuru;
 - ca. Ngawit tedun makrama banjar adat nangken 42 (petang dasa kalih) dina risampun atur supeksa ring prajuru;
 - ra. Yaning wenten janma madunungan magenah ring sajeroning palemahan desa adat Petang sakirang ipun awarsa patut janma punika ngranjing makrama banjar utawi desa adat;
- (3) Sang saking sewosan desa yaning sareng tedun makrama desa ring desa adat patut keni pacingkrem, sane ageng nyane kasulurang manut pararem;
- (4) Yan wenten krama saking sewosan desa sareng ngranjing makrama desa ring desa adat patut kadulurin antuk likita saking desa wiwitan nyane sane jangkep tur polih kakuwuban olih desa pangarep;

- (5) Tata caraning ngranjing dados tamiu :
- ha. Masadok ring kelian banjar manut ring pikamkam kadinasan;
 - na. Nawur prabea manut pararem banjar / desa adat;

Pawos 23

Tategenan miwah swadharma krama desa adat;

- (1) Tategenan krama luwire ;

- ha. Krama ngarep, keni urunan miwah ayahan mamungkul;
- na. Krama balu, keni ayah ,manut kawongania :
 - 1) Balu ngelisting, lanang utawi istri keni ayahan' lanang utawi istri;
 - 2) Balu makrambian, lanang utawi istri sane madruwe santana lanang utawi istri sampun mayusa 17 (pitulas) warsa keni ayahan balu;
 - 3) Balu nyapian keni papeson mepek, ayah manut arah- arahan banjar utawi desa adat yening balu lanang keni ayah lanang, balu istri keni ayah istri;

- (2) Krama Desa Adat kadadosang.

- ha. Mapuankid utawi tan tedun ngayah wyadin parum luwire :
 - 1) Ritatkala mapawangunan makadi nasarin, ngeraab in sanggah, piasan, bale daja, bale dangin, bale dauh, klumpu miwah paon;
 - 2) Ritkala mayadnya, ngotonin sane kapertama, nyakapang, masangih, mapasaksi, kicalan putra, sungkan lan patirthan;
 - 3) Maluasan utawi ngaluang;
 - 4) Matepetin lan siyosan, matepetin salami asasih;

- 5) Mapuankid sungkan salami (tigang) dina, nenten dados medal, yaning sampun adina kenak (seger) mangda masadok ring prajuru;
 - 6) Polih dadauhan saking guru wiseasa;
- na. Nyada mapiteges mademang ayah lan papeson, risampun mayusa 65 (nem dasa lima) warsa utawi lintang wiadin sangkaning pinunas suang-suang mawiwit sungkan-sungkanaan;
- ca. Mogpog, ngetut ayahan saha papeson antuk brana, manut pararem, majeng ring krama desa sane magenah ring dura desa adat;
- ra. Panyeledihi nyade wiadin nyuksukin ayah risampun mayusa 17 (pitulas) warsa;
- (3) Swadharmaning krama adat, luwire :
- ha. Satinut ring sadanging awig – awig, pararem lan pasuara desa adat;
- na. Tan maren sareng mautsaha, mangda desane prasida nyujur patitis ring ajeng;
- ca. Sayaga sareng natakin panes tis kerti yasan desa adat;
- ra. Keni paturunan, peson – peson lan ayahan mamungkul;
- (4) Swadarmaning Krama Tamiu inggih punika :
- ha. Satinut ring tatiwak desa adat ngeninin indik ngupadi kasukertan desa adat ring sakala lan niskala;
- na. Tan kengin nungkasin kertiyasan desa adat;
- ca. Patut masadok ring kelian banjar ritatkala narima tamiu nyantos lintang ring 24 jam;
- ra. Ngaturang punia lan ayah ring parhyangan manut kabuatan;
- (5) Swadarmaning Tamiu, inggih punika :
- ha. Satinut ring tatiwak desa adat ngeninin indik pawongan lan palemahan;
- na. Tan kengin nungkasin kertiyasa desa adat.

- ca. Patut masadok ring kelian banjar ritatkala narima tamiu nyantos lintang ring 24 jam;
- ra. Keni punia manut pararem;

Pawos 24

Kepatutan krama adat sakadi ring sor :

(1) Kapatutan krama adat makadi ring scr :

- ha. Polih pasayuban saking desa;
- na. Polih Kasukertan makadi kasucian dewek, parhyangan miwah karangnyane;

- ca. Polih kasukertan padruwean nyane sowang – sowang;
- ra. Ngamedalang usul ritatkala wenten paruman ring desa sane mabuat;

- ka. Dados prajuru ring banjar utawi desa lan kertha desa manut pararem;
- da. Polih pamutus saking prajuru ritatkala wenten wicara;
- ta. Polih laluputan manut pararem;

(2) Kapatutan Krama Tamiu :

- ha. Patut madana punia ring desa/banjar adat, manut pararem;
- na. Patut polih pasayuban marupa pitulung rikanjekan katiben pancabhaya;
- ca. Polih pamutus saking prajuru ritatkala wenten wicara;

(3) Silih tunggil krama desa lan tamiu tan kadadosang ngajak wong wadon tuna susila ngranjing miwah ngarerep ring wawidangan desa adat, sapasira ugi sane piwal, patut keni pamidanda manut pararem;

- (4) Krama desa, krama tamiu lan tamiu tan kadadosang makta, nganggen, madruwe sarana, sane tan manut ring uger – uger guru wisesa, makadi narkoba (narkotika miwah obat-obatan terlarang lan narkotika, psikotropika lan zat adiktif lainnya /napza) sapasira ugi sane piwal, patut keni pamidanda manut pararem tur sang malaksana patut kasuksara ring sang rumawos;

Pawos 25

Wusan dados krama desa :

- (1) Sangkaning :
- ha. Lampus;
 - na. Pinunas ngraga;
 - ca. Kanorayang, malantaran piwal ring awig – awig miwah pararem desa, utawi tan satinut ring pituduh prajuru sajeronin indik nyupat sikian, minakadi nenten prasida ngehehin prawerti;
- (2) Sang wusan dados krama desa taler kabawosan wusan mabanjar adat, mangda nenten kabawosang empak ngulanting;
- (3) Sang wusan dados krama desa tan polih pahpahan druwen desa utawi banjar, tur tan polih pasayuban malih sajeroning ala ayu;
- (4) Sang kanorayang dados malih tedun makrama desa yaning sampun maseh parisolah ipun tur malarapan antuk katerima ring banjar adat sowang – sowang maweweh pamogpog manut pararem;
- (5) Prade sangkaning rahayu patilare, polih lekita bukti patilar saking parajuru desa;

Pawos 26

Ayah – ayahan krama:

- (1) Satunggil krama, manut paetangan nyane, keni ayah – ayah sakadi ring sor :

- ha. Ayahan utama inggih punika ayah sane kamargiang olih krama sane ngamargiang swadarma ekajati utawi dwi jati;
- na. Ayahan ngarep inggih punika ayah sane kemargiang olih krama sane dados krama adat sane jangkep alaki rabi. Ayahan ngarep mapiteges paturunan, peson – peson miwah ayahan mamungkul;
- ca. Ayahan balu inggih punika ayahan sane kamargiang olih krama balu sekadi ring sor ;
- 1) Balu ngempu, keni ayah aparo lan urunan mepek;
 - 2) Balu ngelintik, luput manuk;
- ra. Ayahan deha truna luput manuk;
- (2) Soang-soang ayahan punika wantah kamargiang siki kemanten, manut kawentenan krama inucap;
- (3) Sahananing krama sane sampun munggah daha truna, sowang –sowang patut sareng ngayah sane kawastanin ayahan deha truna;
- (4) Ayahan deha truna punika kapupulang sajeroning sekaa truna;
- (5) Sekaa truna punika patut wenten ring sowang – sowang banjar adat;

Pawos 27

Tata titi krama desa utawi tamiu, sane nampi tamiu jantos marerepan patut nginutin :

- (i) Krama desa, krama tamiu lan tamiu sane nampi tamiu utawi jantos marerepan :
- ha. Mangda masadok ring kelian banjar, adina saking ngawit marerepan ring genah sang narima;
- na. Yening krama tamiu utawi tamiu punika madunungan jantos asasih, kelian banjar patut nureksain kabuatan nyane madunungan, kaadungan ring ilikita sane nyan-tenang kabuatan ipune;

- (2) Yening kabuatan nyane tan manut ring sane kajantenang, kelian banjar wenang ngawaliang krama tamiu utawi tamiu inucap;
- (3) Yening krama tamiu utawi tamiu punika jenek rawuhing nem sasih taler durung kasadokang, krama desa utawi tamiu sane nampi patut keni pamidanda manut pararem;

Palet 2
Pamucuk Desa
Pawos 28

Pamucuk Desa Adat dudonan ipun makadi ring sor :

- (1) Sabha Desa;
- (2) Kertha Desa;
- (3) Prajuru Desa;

Sabha Desa
Pawos 29

- (1) Saba Desa, inggih punika paruman desa sane kamiletin olih krama desa maka sami miwah prajuru desa maka sami rawuhing prajuru banjar maka sami, napkala pacang mawosin saparindikan desa adat rawuhing awig-awig miwah sakancan sane mapakilitan ring desa adat sane mabuat ngaruruh pamutus ring desa adat;
- (2) Sabha Desa, wenang taler mawosin indik sane mapakilitan ring pidabdab *tri hita karana* makadi :
 - ha. Indik parhyangan;
 - na. Indik pawongan; lan
 - ca. Indik palemahan;

Kertha Desa

Pawos 30

- (1) Kertha Desa inggih punika genah prajuru desa lan krama desa nunas dharma tatimbang yening wenten nepasin daging awig – awig;
- (2) Swadharma kertha desa, wenang mapaica saluwiring dharma tatimbang ring prajuru desa napkala :
 - ha. Indik prajuru desa sane singsal ngamargiang awig – awig;
 - na. Indik krama desa sane pacang nguwah nguwuhin awig – awig desa adat;
 - ca. Indik wentene wicara ring desa adat sane kasungguh² perkara;
- (3) Kertha Desa patut ngicenin dharma tatimbang lan ngawantu prajuru desa lan krama desa yening wenten pikobet indik pamargin awig – awig lan adat-istiadat;

Pawos 31

Tata Cara Ngadegang Kertha Desa

- (1) Kertha Desa akeh nyane 3 (tiga) diri nyantos 5 (lima) diri, manut kabuatang;
- (2) Sane dados kaadegang kertha desa luwirnya :
 - ha. Mawiwit saking krama adat, bilih kangkat naenin dados prajuru desa utawi banjar;
 - na. Wikan lan pascap ring hukum adat, agama lan hukum nasional pamekas waged ring adat-istiadat sane mabantang ring catur dresta lan agama Hindu;
 - ca. Ritatkala kacawis, mayusa sakirangnya 35 (sasur) warsa;
 - ra. Kapilih oleh prajuru desa, lan tedung desa suwenyane dados kertha desa 5 (lima) warsa;

Prajuru Desa

Pawos 32

(1) Sane kasinanggeh prajuru desa inggih punika :

- ha. Bandesa;
- na. Patajuh;
- ca. Penyarikan;
- ra. Patengen;
- ka. Kasinoman Desa;

(2) Prajuru Desa patut :

- ha. Mawiwit saking krama adat utawi ngarep;
- na. Waras lan tan cacat angga pramana;
- ca. Maparilaksana becik lan tan cacat hukum;
- ra. Jujur, prajnyan, wicaksana, madruwe pangunadika lascarya ngayah;

Pawos 33

Tata Cara Ngadegang Prajuru Desa

(1) Tata cara ngadegang prajuru desa :

- ha. Soang - soang banjar dados ngamedalang 1 (siki) calon bandesa mawiwit saking krama adat utawi ngarep;
- na. Kawentenan prawartaka pamilihan, sane kamanggalaning olih prajuru desa sane lawas, kawantu olih kelian utawi prajuru banjar sane kasudi;
- ca. Calon saking prajuru banjar kaselehin antuk prawartaka, raris kapastikayang wenten 1 - 3 calon bandesa;
- ra. Pemilihan kamargiang ring wantilan desa adat, soang - soang kelian banjar patut nitenin lan nureksain pamargi pemilihan bandesa inucap;

Prajuru Desa

Pawos 32

(1) Sane kasinanggeh prajuru desa inggih punika :

- ha. Bandesa;
- na. Patajuh;
- ca. Penyarikan;
- ra. Patengen;
- ka. Kasinoman Desa;

(2) Prajuru Desa patut :

- ha. Mawiwit saking krama adat utawi ngarep;
- na. Waras lan tan cacat angga pramana;
- ca. Maparilaksana becik lan tan cacat hukum;
- ra. Jujur, prajnyan, wicaksana, madruwe pangunadika lascarya ngayah;

Pawos 33

Tata Cara Ngadegang Prajuru Desa

(1) Tata cara ngadegang prajuru desa :

- ha. Soang - soang banjar dados ngamedalang 1 (siki) calon bandesa mawiwit saking krama adat utawi ngarep;
- na. Kawentenan prawartaka pamilihan, sane kamanggalaning olih prajuru desa sane lawas, kawantu olih kelian utawi prajuru banjar sane kasudi;
- ca. Calon saking prajuru banjar kaselehin antuk prawartaka, raris kapastikayang wenten 1 - 3 calon bandesa;
- ra. Pemilihan kamargiang ring wantilan desa adat, soang - soang kelian banjar patut nitenin lan nureksain pamargi pemilihan bandesa inucap;

Prajuru Desa

Pawos 32

(1) Sane kasinanggeh prajuru desa inggih punika :

- ha. Bandesa;
- na. Patajuh;
- ca. Penyarikan;
- ra. Patengen;
- ka. Kasinoman Desa;

(2) Prajuru Desa patut :

- ha. Mawiwit saking krama adat utawi ngarep;.
- na. Waras lan tan cacat angga pramana;
- ca. Maparilaksana becik lan tan cacat hukum;
- ra. Jujur, prajnyan, wicaksana, madruwe pangunadika lascarya ngayah;

Pawos 33

Tata Cara Ngadegang Prajuru Desa

(1) Tata cara ngadegang prajuru desa :

- ha. Soang - soang banjar dados ngamedalang 1 (siki) calon bandesa mawiwit saking krama adat utawi ngarep;
- na. Kawentenan prawartaka pamilihan, sane kamanggalaning olih prajuru desa sane lawas, kawantu olih kelian utawi prajuru banjar sane kasudi;
- ca. Calon saking prajuru banjar kaselehin antuk prawartaka, raris kapastikayang wenten 1 - 3 calon bandesa;
- ra. Pemilihan kamargiang ring wantilan desa adat, soang - soang kelian banjar patut nitenin lan nureksain pamargi pemilihan bandesa inucap;

- ka. Calon sane kacawis paling makweh sane jayanti;
 - da. Bandesa wenang nyudi pangabih nyane;
 - ta. Pengabih sane kasudi mawiwit saking soang-soang banjar saking krama desa pengarep;
- (2) Prajuru Desa kaadegang 5 warsa apisan olih paruman agung desa adat;
 - (3) Prajuru sane wawu kacawis kaupesaksiang ring pura desa;
 - (4) Sajawaning wenten parindikan sios, sang sampun puputing panumaya dados prajuru, kengin kadegang malih dados prajuru;
 - (5) Prade kelian desa adat utawi bendesa adat mararyan, sadurung, panumayanipun, swadharman nyane kamargiang olih patajuh, utawi penyarikan jantos puput pemilihan bendesa anyar paling suwe 6 (nem) sasih;

Pawos 34

- (1) Ritatkala ngamargiang kasukertan desa adat, Bandesa kawantu olih :
 - ha. Patajuh, pinaka wakil bendesa;
 - na. Penyarikan, pinaka juru surat utawi sekretaris;
 - ca. Patengen, pinaka pangemong druwen desa;
 - ra. Kelian – kelian banjar sawidangan desa adat;
 - ka. Kasinoman pinaka juru arah ring sowang – sowang banjar;
 - da. Pecalang sane nreptiang pamargi ritatkala wenten karya adat lan Agama Hindu;
 - ta. Widya Sabha, Majelis Alit, Parisadha Hindu Dharma;
 - sa. Panureksa druwen desa;
- (2) Ritatkala ngenterang kasukertan ring niskala, bandesa patut masinggihang pamangku kahyangan tiga;
- (3) Indik tatat iti ngadegang pecalang, swadarma lan patitisipun, kamanggehang manut pararem;

Pawos 35

- (1) Swadharmaning Bandesa, inggih punika :
 - ha. Ngenterang paruman – paruman desa adat;
 - na. Ngenterang pangelaksana sadaging awig-awig miwah pamutus- pamutus krama desa sane sinanggeh pararem;
 - ca. Ngraksa miwah nudonang tata-titine migunayang artha brana druwen desa;
 - ra. Nuntun saha ngenterang krama desa rawuhing warga desa sami, ngupadi kasukertan sakala lan niskala;
 - ka. Nuntun saha nyaksi upacara sangskaraning kahuripan sane mabuat;
 - da. Nuntun saha ngenterang warga desa, nginggilan sang hyang agama, kasucian kahyangan, kasucian palemahan, kasucian pawongan, miwah tata- titine migunayang setra;
 - ta. Mawosin miwah niwakang pamutus marep ring wicara krama;
 - sa. Maka duta desa adat, matemuang babawos ring sapasira ugi;
 - wa. Lan sane sewosan sane weten pakilitanya ring desa adat;
- (2) Tata-titi ngalaksanayang swadharma inucap ring ajeng, tan maren patut satinut ring daging awig-awig, pararem, dresta miwah pamutus paruman krama desa adat;
- (3) Panglaksanane ring ajeng patut kasobyahang ring desa adat, kapungkur ipun;
- (4) Sumakuta utawi sumanggup natak pamutus paruman krama desa adat ngenanin swadharmaning sowang-sowang prajuru;

Pawos 36

Swadharmaning Patajuh

Swadarmaning petajuh inggih punika ngewantu bandesa adat sajeroning pakaryan sane mapakilitan ring widang parhyangan pawongan lan palemahan;

Pawos 37

Swadharmaning Penyarikan

Swadarma Penyarikan inggih punika ngawantu bandesa adat ngaryanin salwir sewalapatra, nabdabin inventaris desa tur nyuratang saluwiring pamutus pangrawos desa ring sangkepan;

Pawos 38

Swadharmaning Patengen

Swadarmaning Patengen inggih punika ngawantu bandesa adat ngaryanin utawi ngarincikang sakaluwir pangranjing miwah pamedal jinah desa adat lan ngupapira padruwen desa adat;

Pawos 39

Swadharmaning Kasinoman

Swadarmaning kasinoman desa inggih punika ngawantu bandesa adat nyobyahang sewalapatra utawi pamutus pangrawos desa ring krama desa;

Pawos 40

Swadharmaning Pacalang

- (1) Swadarmaning pacalang desa inggih punika ngawantu bandesa adat nreptiang pamargin upacara yadnya, dharmaning agama lan dharmaning negara;
- (2) Parindikan tatacara ngadegang pacalang, swadharma miwah sasananing pecalang kamanggehang manut pararem;

Pawos 41

Petias utawi olih-olihan lan laluputan pamucuk desa adat, kamanggehang manut pararem;

Pawos 42

- (1) Wusan dados pamucuk desa adat sangkaning :
 - ha. Lampus;
 - na. Pinunas ngaraga;
 - ca. Swadharmanya sampun puputing senger;
 - ra. Kawusang utawi kanorayang olih krama desa dwaning iwang pamargi, manawi nilar sesana;

- (2) Ngentosin, ngwusanang utawi nganorayang pamucuk desa adat, patut kamargiang ring sajeroning paruman agung desa adat;

Pawos 43

Petias utawi olih-olihan prajuru desa luwire :

- (1) Luput rerampen (peson-peson);
- (2) Polih tanding tengah;
- (3) Upon catu utawi labha carik utawi tegal;
- (4) Wantuan marupa insentif saking guru wiseasa;
- (5) Petias siwosan manut pararem;

Palet 3

Indik Kulkul

Pawos 44

- (1) Kulkul ring Desa Adat Petang luwire :
 - ha. Kulkul Desa;
 - na. Kulkul Banjar;
 - ca. Kulkul sekaa-sekaa;

- (2) Tabuh tatepakan kulkul desa:
- ha. Kalih tulud lamban, tatengeran tedun ngayah;
 - na. Atulud bulus, tatengeran kapancabhaya;
 - ca. Pitung klentungan kalih tulud, tatengeran kalayu sekaran;
- (3) Tengeran kulkul ring soang-soang babanjaran makadi ring sor :
- ha. Tigang klentungan tatengeran ngrorod (nganten);
 - na. Kalih tulud lamban salantur ipun, nedunang banjar;

Pawos 45

- (1) Kulkul desa utawi banjar tan wenang katepak yening tan sangkaning pituduh prajuru desa utawi banjar, sajawaning tengeran kapanca bhaya;
- (2) Sang nepak tan sangkaning pituduh prajuru patut digelis atur supeksa maka buatan panepake, yan tan manut ring uger-uger, wenang sang mamurug kadanda manut pararem;
- (3) Kulkul sekaa-sekaa, samalih kulkul pondokan tan kalugra nyawerin (matehin) sukat utawi tengeran kulkul desa / banjar prade mamurug kadanda manut pararem;

Palet 4

Indik Paruman

Pawos 46

- (1) Paruman utawi sangkepan ring desa adat Petang wenten :
- ha. Paruman desa utawi banjar kawentenang :
 - 1) Nyabran ngasasih, maka cihna tan paarah-arrah, duaning sampun tetep panumaya manut pararem bebanjaran soang-soang;
 - 2) Napkala (patgata kala) maka jalaran arah-arrah manut tatujon;

- na. Sangkepan prajuru desa, kawentenang manut wiguna;
- ca. Paruman sekaa-sekaa manut babuat;
- (2) Paruman desa utawi banjar madudonan sakadi ring sor :
- ha. Prasida lumaksana risampun katedunin antuk sang patut ngamiletin parum sane kamanggala antuk tengeran kulkul miwah mabusana adat, saha tan kalugra makta gegawan miwah tan maren ngarcana ring Ida Bhagawan Penyarikan maka sarana widhi widana cane;
- na. Maka sarana jagi pengawit kalaksanayang sep-sepan saha riwusan nyacah krama , kalanturang antuk nuduk , dadosan sane agung alit ipun manut pararem;
- ca. Tan kalugra ngawetuang suara ghora utawi byuta yan wenten asapunika keni pamidanda bya pacamil manggeh makadi dandaning nguman-uman ring sabha;
- ra. Pamutus babawos briuk sapanggul (ingkup) punika sane kemanggehang;
- (3) Prade daging paruman tan kacumponin mangda prajuru desa utawi banjar ngilikang babawos, saha pamutusnia mangda kararemang olih krama desa utawi banjar, samaliha prade tan prasida kasungkemin jantos ping tiga, prajuru banjar wenang nunas bawos ring kertha desa manut undagan luire : kamanggeh paingkupan prajuru, ngraris panglingsir, panguntat paruman krama desa;

Pawos 47

- (1) Sajeroning paruman desa, bandesa adat patut nyobyahang pamargin ngenterang desa, pamekas ngenanin indik:
- ha. Munjuk lungsur ring tata pakraman saha ayah-ayah, sulur artha brana druwen desa;
- na. Rencana prajuru ngenanin usaha desa kapungkur;

- (2) Pamutus paruman desa sinanggeh pararem maka pamitegep pamargin awig-awig;

Pawos 48

- (1) Sangkepan prajuru desa kawenangang ngarincikang pangrencana pawangunan, sakemawon tan kawenangan ngamedalang tategenan ring krama desa, sadurung keingkupin utawi kasung kemin antuk krama desa sajeroning paruman adat;
- (2) Pamutus sangkepan prajuru desa ngawetuwang paswara, maka pidaging pituduh sang ngawiwenang ngonekang pecak pararem krama desa;

Palet 5

Indik Druwen Desa

Pawos 49

- (1) Padruwen Desa Adat Petang sekadi ring sor :
- ha. Kahyangan desa, lwire :
 - 1) Kahyangan Tiga;
 - 2) Pura Prajapati;
 - 3) Pura Melanting;
 - na. Lembaga Perkreditan Desa (LPD);
 - ca. Bale Desa Adat lan Bale Banjar Adat;
 - ra. Tanah tegalan;
 - ka. Karang ayahan desa;
 - da. Setra;
 - ta. Laba pura, minakadi carik lan tegal ;
 - sa. Lelanguan, minakadi: tetabuhan lan ilen-ilen padruwen desa lan banjar, luire :

- 1) Gong /gambelan/karawitan;
- 2) Geguntangan, soang-soang banjar gong lan kaklentangan, soang-soang banjar;
- 3) Ilen-ilen wali pura makadi rejang, pendet;
- 4) Lekita-lekita, luwire pipil krama, awig-awig, paswara utawi pararem desa;

wa. Nyasa, sasanti;

(2) Olih-olihan desa adat Petang luwire :

ha. Olih-olihan saking labha pura;

na. Urunan krama desa adat utawi banjar adat;

ca. Wantuan saking guru wisesa;

ra. Dana punia tiosan, sane patut;

Pawos 50

- (1) Prajuru desa wenang ngetangang pamupon labha pura lan sapanunggilan druwen desa;
- (2) Pikolih lan pamupon nyane kaanggen prabya piodalan lan wewangunan ring pura;
- (3) Nyabran pasangakepan desa, prajuru pengamong druwen desa ngawentenang piuning pariindik munjuk lungsur padruwen desa ring krama desa;
- (4) Sakaluwir druwen desa patut wenten ilikitan nyane;
- (5) Tan kalugra ngadol utawi ngesahang druwen desa yan tan kasungkemin antuk paruman krama desa;

Palet 6

Panyanggran Banjar

Pawos 51

Krama desa rikala karya suka dukka, kawenangang kasanggra antuk banjar luwire;

- (1) Prade ngawangun pitra yajnya utawi manusa yajnya, manut pinunas sang mayajnya;

- (2) Pangromba utawi karya gotong royong krama jantos ping tiga, selangkungan punika patut katuran pangu;
- (3) Pangu rikala pitra yadnya manut abot ingan yadnya sane kawangun, prade saking semeng ngantos wengi, katuran pangu ping kalih;

Palet 7

Indik Pawiwahan

Pawos 52

- (1) Pawiwahan inggih punika patemoning purusa lan pradana malarapan antuk panunggalan kahyun suka cita, sane kaupasaksiang sekala niskala (prajuru lan widhi widhana);
- (2) Tatacara pamargin pawiwahane madudonan makadi ring sor:
 - ha. Papadikan sane kamanggala antuk pakrunan;
 - na. Ngarorod, ngarangkat rihin wawu kakrunayang;
 - ca. Nyeburin utawi nyantana sane mateges sang pradhana mawak purusa;
- (3) Mungging wenang yusane patut mawiwaha, paling kidik 17 warsa lanang utawi sane istri;
- (4) Lila tan lila pikahyunan sang pacang alaki rabi nyihnayang pabinayan pamargin pawiwahane minakadi sane kawastanin mapadik miwah ngarorod utawi marangkat;
- (5) Malaku mapiteges mitahuang ring reraman sang kicalan dahane wiadin malaku kulkul;
- (6) Yening wong alaki rabi tan prasida ngawetuang pratiantana kapurusa wenang pikurenan inucap ngidih santana saha kaupasaksi sakala niskala;
- (7) Sajeroning pakrunan utawi panglukuan patut kawicarayang indik:

- ha. Paiguman babawos indik idih- pakidih saha dewasa pakerab kambeyane riwekas saha prajuru desa adat miwah dinas, pinaka prasihna sampun kabawos sah sakalaning pawiwahan inucap;
- na. Taler kecihnayang mungging manggeh kapurusane antuk santana rajeg wiadin kapurusan wiakti , prade santana rajeg kajejerang patut ngidih anak lanang, sane kawastanin pawiwahan nyeburin;
- (8) Widhi-widhana pakerab kambean saha banten pejati katur ring pamrajan utawi sanggah kamulan wadone, wastu tinas apadang papamite mapikuren sekala kalawan, niskala;
- (9) Pakerab kambean mapiteges ngarawuhang (ambe) ikrama desa kasiarin (kerab) mungging kawentenan silih sinunggil mawiwaha, ketahnia kawastanin upacara puput mapikuren;
- (10) Yen prade mamurug kecape ring ajeng (1) antuk wenang kadanda antuk banjar miwah paseka-sekaa gung arta manut pararem;

Pawos 53

Sane kebawos sah mapikuren manut ring linging awig-awig puniki makadi ring sor:

- (1) Widhi-widhana sakirang ipun upacara pabyakalan antuk banten asidi, pinaka dhurmanggala kaletihan pangrorodane, makasihna bukti niskala saha pajangkepan sang alaki rabi maka cihna sakalanya;
- (2) Prajuru sajeroning pangerorodan inucap minakadi panyaksianing wicara babawosan ngawit sakeng palakuan jantos pakrunan;
- (3) Likita inggih punika prasihna daging upasaksi inucap ring ajeng, turah mangkine kaungguhang ring pustaka indik krama (pipil krama);

- (4) Patut nawur prabya upasaksi manut pararem;

Pawos 54

Swadarmaning sang pacang alaki rabi, kengin taler ngawen-tenang pasubaya pawiwahan, miwah tingkahe ngarorod patut :

- (1) Sajeroning parorodan patut reraman lanange mapilaku ring reraman wadone antuk duta sakirangnia adiri sama kuwehnia tigang diri;
- (2) Waneng pamargin dutane kengin tan kasepan ring adina (24 jam);
- (3) Prade genahe madohan, bilih-bilih ngalangkungin sagara' kengin duta inucap mapawanengan jantos tigang dina.
- (4) Yan mamurug kadi kecape ring ajeng, keni janma inucap kadanda gung artha manut pararem;
- (5) Risampun reraman wadone narima pamilaku inucap ring ajeng, patut nyuarayang kukul tigang klentungan (atulud) maka cihna silih sinunggil warga desa utawi banjar wenten sane ngamargiang kramaning alaki rabi;

Pawos 55

- (1) Prade panglukuan lan parorodane tan katrima raris nepak kukul tigang klentungan, mahelatan sawatara ajam raris bulus malih atulud;
- (2) Asapunika taler panepake yan nenten wenten pamilaku wiadin kaicalan deha (kelangan bajang)patut kawentenang kukul pamitahu manut dresta;
- (3) Sapangrawuh krama banjar saha prajuru patut nunas panuntun pacang netes pangororodan wiadin masaserep;
- (4) Risampun katureksain olih prajuru, sang nepak sangkaning tan terima palakuan mapiteges ngrawuhang duta, wenang janma ika kadanda gung artha manut pararem;

Tata kramaning netes parorodan patut sakadi ring sor :

- (1) Prajuru Banjar utawi Prajuru Desa patut sayaga nureksa natasang saserep punika, jati tan jatin nyane patut utawi prenah wirang sang ngarorod;
- (2) Yan linggih nyane jati-jati patut wirang, kelian desa utawi kelian banjar patut digelis ngenter saserep punika kaumah genah sang ngarorod;
- (3) Sang netes patut tinut ring sapituduh kelian ngenanin tata titi netes pangerorodan luire :
 - ha. Ngranjing kadunungan inucap tan langkungan ring, kalih diri (reramania muah I kelian);
 - na. Tan kengin makta gegawan lan sapanunggilanya.
 - ca. Tan kengin matingkah kalih mabawos wak parusya nantang-nantang;
- (4) Sanapake I kelian patut midadabin mangda tata carane netes trepti, maka buatan mangda anake istri sane ngarorod jati-jati polih nerangang idep nyane sebeb ipun, wirang panetese mangda polih mireng ucapan anake istri punika, lui pidadabe :
 - ha. Anake istri kagenahang ngraga, tan dados anak sewos nangsekin prade kirang ring tigang depa tur tinas ring inange;
 - na. I Kelian nuntun nyulurang mangda sang netes polih mapitaken ring sang istri punika;
 - ca. Prajuru adat lan dinas patut nyumakutayang pamekas ring sang istri, mungging dane pacang ngicenin pasayuban manut ring daging idep sang istri. Yan pada arsa pangrorodane sang netes pacang matulak, yan sangkaning pepaksan sang lanang pacang katiwakin pamidanda manut pararem, wiadin katundung, sah istri inucap katulakang utawi kawaliang marep ring reramania;

- (5) Pamupute, prajuru sane netes sumangdane malaksana manut ring pamutus idep anake istri sane katetes;
- (6) Sane kebawos pewiwahan tan sah sakadi :
 - ha. Natab upakara sakeng papaksan;
 - na. Nenten wenten upasaksi miwah ilikita;
 - ca. Silih sinunggil tan rawuh saha tan wenten cihna ilikitan nyane;

Pawos 57

Tan kalugra mawiwaha sangkaning:

- (1) Gamia gamana makadi mapikuren sareng guru rupaka, pratisentana, rerama, kaponakan, sameton sodet lan, sapanunggilan ipun;
- (2) Sapasira mamurug wenang pawiwahane kapalasang muah kadanda gung arta manut pararem saha kawuwuhin mrayascitta jagat manut pararem;
- (3) Yen prade mawiwaha arep ring sewosan Agama Hindu, patut kamanggalanin antuk Upacara Sudiwadani;
- (4) Mungging palinaksanan asumundung, anglangkahi karang hulu nenten kamargiang malih sakemawon tan ngirangin pikahyunan sang sane katiben parindikan punika ngawentenang upacara patiwangi;

Pawos 58

Swadharmaning alaki rabi patut sakadi ring sor :

- (1) Saling asah, asih, asuh, panunggiling idhep kalawan laksana;
- (2) Sang lanang patut ngayomin saha ngupajiwa rabine, wadone patut mratyaksayang pagrehastane;
- (3) Sinanggeh guru rupaka arep ring pratisantananya patut ngicenin pangaweruh saha ngupajiwa sasida-sidayan majeng ring pratisantananya utawi katurunanya;

- (4) Yan prade mamurug kecape ring ajeng kengin silih sinunggil masadok ring prajuru desa, bilih tan kuasa katumusang ring sang rumawos, tur kangkat parabiane kapiteketin mangda sulur parabiane kamargiang manut swadharma;

Palet 8

Indik Nyapian

Pawos 59

- (1) Nyapian inggih punika palas marabian mawiwit sangkaning wicara utawi sami-sami padha lila, maka cihna tan prasida tumus suka citaning panunggalan idep utawi adung malih sajeroning dharmaning alaki rabi;
- (2) Palas marabian sangkaning silih sinunggil lampus kawastanin balu, makadi balu lanang wiadin istri;
- (3) Palas marabian sangkaning wicara utawi sangkaning pada lila patut silih sinunggil atur supeksa pailikitanya riyin ring prajuru desa, selantur ipun wawu kengin katumusan ring sang rumawos tur pamuputnya kawastanin nyapian;

Pawos 60

- (1) Sulur palas perabiane patut wenten pracihna silih sinunggil maparilaksana anasar laku, cedangga, wiro-saning laku, matilar tan pasadok miwah wakpurusya lan tan prasida adung malih mawastu makinkin pacang palas mapikuren;
- (2) Tatacara palas marabian (nyapian) pamargine makadi ring sor :
- ha. Yan wicarane katumusang antuk lanange patut wadone macihna kadi ring sor :
- 1) Sane istri dratikrama utawi sasar laku.
 - 2) Sane istri amedel sanggama wiadin meambul-ambulan salamin ipun jantos 6 (nem) sasih;

- 3) Sane istri cedangga lan sapanunggilan ipun;
na. Yan wicarane katumusang olih istrine pracihna lanange makadi ring sor :
 - 1) Sane lanang anasar laku;
 - 2) Sane lanang cedangga utawi wangdu;
 - 3) Tan nyanggamen sakirang ipun jantos nem sasih;
 - 4) Tan ngupajiwanin sakirang ipun jantos nem sasih lan sapanunggilan ipun;
- (3) Yan prade wicarane makadi kecape ring ajeng (1), (2) patut kadanda sami-sami manut pararem tur patut mesamsam, ring bale agung;

Pawos 61

Yan prade palas, sangkaning sami lila :

- (1) Patut naur prabiya upasaksi sami matenga utawi aparo;
- (2) Mungwing druwe pagunakaya polih pahan padha (kepah kalih);
- (3) Pangupapiran prasantana kamargiang manut ring swadharmaning guru rupaka;
- (4) Mungwing warisan, kakwasayang antuk purusa;
- (5) Mungwing pabekel utawi tetatadan (dhanajiwa) patut kakwasayang niri-niri;
- (6) Patut nepak kulkul tigang klentungan alon manut suaran kulkul sang palas marabian;

Pawos 62

Yaning palas perabiane sangkaning wicara minakadi silih sinunggil macihna kadi ucaping tri premana, wenang :

- (1) Parabiane kapalasang;
- (2) Ngalaksanayang upacara masamsam ring pura Bale Agung;

- (3) Tan kengin makta artha brana tadadan.;
- (4) Katiwakin pamidanda gung arta manut pararem;
- (5) Nawur prabya upasaksi manut pararem;
- (6) Patut nepak kulkul tigang klentungan(atulud)banban;

Pawos 63

Prade riwekas sang palas marabian kacihna adung malih marabian patut:

- (1) Ngalaksanayang upacara pawiwahan malih makadi patut;
- (2) Naur prabiya upasaksi manut pararem;
- (3) Keni pamidanda gung artha nikel manut pararem, yadiastun wit palase pecak sangkaning lila wiyadin mawiwit wicara;

Pawos 64

Mungwing swadharmaning balu makadi ring sor :

- (1) Balu luh boya santana patut ngamanggehang pati brata tan kengin ngamargyang paradara utawi mamitra, sapunika taler balu muani sane nyeburin tan kengin drati krama;
- (2) Paperasan mawiwit waris pagunakaya patut kakuwasayang balu inucap tan kengin kaadol, ngadeyang, makidihang lan siosan punika, yan tan polih kabebasan saking pianak wyadin pakulawarga sane pinih tampek sakeng pakurenan ipun;
- (3) Sang balu wenang ngidih santana manut kadi ring sor :
 ha. Balu pageh;
 na. Sampun wenten pidabdab sadurunge silih situnggil lampus;
 ca. Polih wak-wakan sakeng kulawarga sinanggeh purusa;
- (4) Kawenangang mawiwaha malih manut kadi ring sor :

- ha. Yan prade sampun polih wak-wakan sakeng pianak wiadin kulawarga sinanggeh purusa;
- na. Yan prade nenten wenten kari somah, matua muah tan madruwe pianak;
- ca. Prasida pratisentana sane wetu sakeng pawiwahan kaping kalih polih pedum waris saking padruweyan santana sajawaning wenten pawilangan tios;

Pawos 65

Balu kaucap tan pageh makadi ring sor :

- (1) Dratikrama wiadin paradara;
- (2) Matilar sakeng pakubon utawi tan jenek;
- (3) Yan macihna kadi ring ajeng wenang balu ika :
 - ha. Katundung antuk pianak wiadin kulawarga kapurusa pinih tampek, yan tan madruwe pianak wiadin prade kantung alit-alit;
 - na. Tan polih upon waris;
 - ca. Pagunakaya kewanten polih pahan sami maparo;
- (4) Yan balu sangkaning purusa kengin malih mawiwaha nanging patut taler polih wak-wakan saking pianaknia prade wenten sampun deha utawi truna;
- (5) Yen balu luh utawi muani kapurusan wit santana patut ngidih kabebasan ring pianak utawi kulawarga sang inangkat;

Palet 9

Indik Sentana

Pawos 66

- Indik santana wenten kalih soroh inggih punika prati santana miwah santana paperasan;
- (1) Pratisantana inggih punika santana sane mawetu sangkaning pawiwahan sane sah;

- (2) Yening pawiwahan nenten sah ngawetuang santana kawastanin pianak babinjat utawi astra;
- (3) Yen prade pawiwahan tan ngawetuang pratisantana kengin ngidih santana saha upasaksi sane kawastanin santana paperasan;

Pawos 67

Parindik ngangkat santana patut kadi ring sor :

- (1) Silih sinunggil krama yan pacang ngidih santana patut supekta ring kelian banjar mahelatan 35 dina (sabanen dewasa pamerasan);
- (2) Kelian banjar patut nyobyahang ring banjar kalanturang, ring kelian desa mangda nyobyahang ring wawidangan, desane;
- (3) Sang rumasa kapialang ucaping ajeng sanistane masenger awuku sabanen dewasa pamerasan patut masadok ring kelian desa;
- (4) Kelian desa digelis mawosin saha ngicenin pamutus bawos nepek ring sastra miwah dresta;
- (5) Kengin meras utawi ngangkat santana langkungan ring adiri lanang utawi istri;

Pawos 68

Paperasan sinanggih sah risampune mawidhi widhana, wenten ilikita, saksi tur kasobyahang ring banjar utawi desa;

- (1) Widhi widhana upakara-upacara saha upacara mapamit ring sanggah utawi pamrajan kamulan sane pineras karingan ring sanggah kamulan sang meras;
- (2) Ilikita sulur pamargi pamerasane maka buatan pracihna brana pamerasan;
- (3) Saksi prajuru kadi kelian desa, kelian banjar adat wyadin dinas sane sampun kasobyahang ring banjar utawi desa;

Pawos 69

Sane wenang kaperas kangge santana makadi ring sor :

- (1) Jadma magama Hindu;
- (2) Papernahan nedunan sakeng sang meras;
- (3) Papernahan patut kaambil sakeng purusa yan tan wenten wawu kengin sakeng wadon;
- (4) Yan tan wenten kadi ring ajeng wawu kengin sakama-kama sane magama Hindu;
- (5) Prade mawit saking agama tiosan ring agama Hindu patut katitenin makadi manggeh manut kasukerthan ring gaguat agama Hindu;
- (6) Sane tan wenang kaangkat santana inggih punika :
 - ha. Deha tuwa wyadin truna tuwa;
 - na. Nanging kawenangan ngangkat santana janma sane bekung wyadin balu;

Palet 10

Indik Warisan

Pawos 70

- (1) Warisan inggih punika tetamian artha brana saha ayah ngupadi sukerta sakala niskala saking katurunan arep ring turunanniya.
- (2) Sane sinanggeh warisan luwir ipun :
 - ha. Druwe tengah sakadi karang desa, karang kawis, kahyangan, pasuka siwa karang;
 - na. Pagunakaya, tatadan utawi jiwadana, hutang piutang;
 - ca. Pamrajan utawi sanggah kamulan;

Pawos 71

- (1) Ahli waris utawi turunan inggih punika :
 - ha. Pratisentana purusa;
 - na. Santana rajeg;

- ca. Santana paperasan wyadin wadon;
- (2) Yan prade tan wenten ahli waris kadi inucap ring ajeng sane kasinanggeh ahli waris makadi ring sor :
- ha. Katurunan purusa pernah lenceng ngunggahang makadi rerama misan wyadin midon;
- na. Katurunan purusa pernah kasamping makadi keponakan misan miwah mindon;

Pawos 72

Swadharmaning ahli waris patut sakadi ring sor:

- (1) Narima saha ngwasayang lan ngutsahayang tatamian, pahan saking kaluhurania;
- (2) Ngabenang pawaris tur nglanturang upakara-upacara pitra yajnya salantur ipun;
- (3) Ngempon sanggah utawi pamrajan utawi pura-pura silih tunggil saha upakara upacara yajnya;
- (4) Nawurin utang-utang pawaris;
- (5) Panyeledihi ayah pawaris;

Pawos 73

Warisan kengin kepah manut sakadi ring sor puniki :

- (1) Risampun kalaksanayang pitra yadnya miwah hutang-hutang pawaris buntas katawurin;
- (2) Para ahli waris polih pahan padha sejawaning wenten paetangan sewos;
- (3) Mungwing pradana sane boya ahli waris (tan polih pedum waris), nanging kengin muponing pamupon/asil manut dudonan, minakadi sarembat, sasuwun piteges ipun, ahli waris polih kakalih santana luh asiki;

Sane kasinanggeh pradana manut dresta makadi ring sor :

(1) Santana luh boya ahli waris nanging kengin muponin hasil warisan sekadi ring ajeng :

ha. Selamin ipun dereng mawiwaha wyadin katundung antuk reramanya riantukan alpaka guru;

na. Prade ipun lokika sanggraha manut pawos 68 tur ngawetuang santana nanging tan kauningin sang lanange (yayah wong rare punika) prasantana inucap sinanggeh panak babinjat utawi astra tur wantah kengin mawaris pikolih utawi pagunakayan biange kemawon;

(2) Balu luh wyadin balu muani nyeburin boya ahli waris dwaning sampun mapiteges ninggal kadaton (warisan) riantukan kesah mawiwaha, nanging :

ha. Balu luh kengin muponin asil pahan warisan sang lampus sakantune prasida ngamanggehang pati brata;

na. Yan prade nilar sasana, minakadi mamitra, mawiwaha malih, ipun tan polih muponin asil inucap ring ajeng tur wenang katundung antuk pianake utawi matuanniya;

ca. Asapunika taler balu muani nyeburin dwaning ipun mawak pradana;

(3) Mulih daha utawi truna boya ahli waris, duwaning antuk pawiwahane sampun ninggal warisan, riantukan asapunika patut ipun madarsana rihin arep ring ahli waris wit umahniya prasida kawehin pangupajiwa (anut kawelasan utawi rasa pasametonan);

- (4) Daha tuwa boya ahli waris, nanging kengin muponin hasil warisan sekadi pawos 73 (3) saprasida ngamanggehang swadharmaning daha tuwa, inggih punika duaning rerama umpami sampun lampus, ipun patut tan lempas ring sapari tuduh sameton lanange pinaka pangempu minakadiniya tan kengin ngesahang ngadeyang wiyadin ngadol waris sane kapuponin inucap;

Pawos 75

- (1) Yening sajeroning kulawarga wenten ahli waris langkungan ring adiri patut kawentenang paigum indik pedum waris, punika;
- (2) Yening tan prasida pamutus ucaping ajeng kengin nunas tatimbangan ring prajuru desa sane sinanggeh pangadilan desa (kertha desa), pinaka pamutus bawos;
- (3) Taler patut katunasang pamikukuh ring adat lan dinas makadi majelis lan perbekel;
- (4) Yan tan prasida ucaping makadi ring ajeng patut katunasang ring kertha desa, prade tan cumpu katumusang ring sang rumawos makadi Majelis lan pengadilan negeri;

Pawos 76

Ahli waris kengin tan polih pedum waris riantukan :

- (1) Magentos utawi matilar saking Agama Hindu (nilar sasana)
- (2) Alpaka guru rupaka wyadin guru swadiaya;
- (3) Santana rajeg sane kesah mawiwaha;
- (4) Pratisantana mawiwaha nyeburin ninggal kedaton;

Pawos 77

Pewaris kengin mapaweweh rikala maurip pinaka tatadan :

- (1) Jiwadana utawi tatadan utawi bekel maka cihna paweweh rikala kantun maurip sane ajeg;
- (2) Pangupa jiwa, paweweh padgatakala pawaris arep ring ahli waris maka cihna muponin hasil kewanten;
- (3) Pedum pamong utawi raksa pahan waris padgata kala pawaris arep ring ahli waris ngantos pedum jumenek;

Pawos 78

Yan wenten karang kaputungan wenang prajuru desa mawosin (nureksa sila-sila) tur nibakang pakarangan inucap arep ring :

- (1) Ahli waris saking purusa;
- (2) Paprenahan kasamping, yan tan wenten prenah langgeng ngunggahang;
- (3) Prade tan wenten kadi ucape ring ajeng muah kengin katibakang sakeng wadon;
- (4) Yening taler tan wenten kadi kecaping (1), (2), (3) ring ajeng, wawu kengin sakama-kama nanging manda tunggal Agama miwah Desa sajeroning Desa Adat puniki;

SARGAH LIMA SUKERTA TATA PALEMAHAN Palet 1 Karang, Tegal, lan Carik Pawos 79

- (1) Mungguwing laba, punia-punia kanggen pikenoh prajuru lan pangaci ring kahyangan soang-soang tur makwehnya munjuk lungsur, minakadi kanggen tegak Balai Banjar, kawangunin miwah sewosan punika sane anut ring wiguna miwah tatujon kecaping pawos;

(2) Sakaluring palemahan desa adat patut katitenin makadi ring sor:

Ha. Sakalwiring karang desa patut mewates antuk tembok wiadin pagehan mategeh 1,5 meter;

Na. Watese sisi kaler miwah kangin patut kakaryanin tur kapiara antuk sang madruwe karang, reh punika mawasta magaleng kaluan;

Ca. Yan antuk sang madruwe karang, karasayang pagehan punika ngalikadin, tur yan pada arsa sang madruwe panyanding karang, dados watese punika, ngangge pinget kemanten;

Ra. Watese sane marep kamargine patut katembok mangda pakantenan ipun renes lan asri;

Ka. Asapunika taler yan wenten karang kabebeng, patut kautsahayang mangda wenten margi utawi pamletasan mangda nenten kantong kabebeng;

Pawos 80

Mungguwing tanah druwen desa adat puniki wenten kalih soroh, inggih punika tanah desa miwah karang desa (sane kasinanggeh karang kawis) :

(1) Sane kasinanggeh karang kawis wiadin tanah tatak ayah inggih punika papupulan tanah karang desa rawuh katanah catu miwah tanah tegal, utawi wenten taler pupulan tanah karang desa lan tanah catu wiadin tanah tegal silih sinunggil, wiadin tanah karang desa kewanten sane kawigunayang manggeh trimandala minakadi tanah tegak pamrajan, tegak pamereman, miwah teba;

(2) Karang kawis inucap makweh nyane 66 sapaon manut kadi pawos 1 (3);

- (3) Indik wates karang kawis inucap kaetang antuk prajuru mawiwit gambar IPEDA, tur nginutin pasamaya makadi tanah pakarangan patut magaleng kaluwan miwah tanah tegal, carik magaleng kateben;
- (4) Tanah desa sawengkoning desa adat puniki wenten kalih soroh marupa tanah tegalan lan carik (bukti ring palemahan desa adat Petang);
- (5) Manut ring wigunan ipun ngamanggehang sakalwiring tatujon sakadi kaucap ring ajeng, tanah tatak ayah miwah tanah desa tan kengin kaadol, kagadeang miwah sewosan punika, prade kacihna lempas ring kawigunan nyane kasinanggeh ngingsirang padruwen desa, patut kadanda manut pararem;
- (6) Prade sahasa kedeh jagi ngadol patut atur supekta rihin ring prajuru desa;
- (7) Sapasira ugi sane pacang numbas karang tatak ayah desa patut sayaga nedunin ayahan ngarep, ngadol tanah utawi karang tatak ayah desa patut kaadol rawuhing ayahan nyane;
- (8) Sewosan ring tanah karang desa, wenten malih padruwen silih sinunggil krama, sane sinanggeh pagunakaya wiadin tanah pedi utawi kedi;

Pawos 81

Yan wenten karang kaputungan wenang kabawosang antuk prajuru desa (patut katureksa sila-sila utawi silsilah nyane) tur katibakang karang punika marep ring :

- (1) Ahli waris saking purusa;
- (2) Paprenahan kesamping, yan wenten prenah langgeng ngunggahang;
- (3) Prade tan wenten ucaping ajeng (1), muah (2) kengin katibakang saking wadon;

- (4) Yening taler tan wenten kecaping (1), (2), (3) ring ajeng, wawu kengin sakama-kama nanging mangda tunggal agama miwah tunggal sasumbahan makadi tunggal sanggah, paibon, dadya saha wenten ring sajeroning desa (sejeroning desa adat);

Pawos 82

- (1) Tegol miwah carik patut magaleng kateben, teges ipun watese sane sisi kulon wiadin kidul, patut kakaryanin tur kapiara antuk sang madruwe tegol miwah carik;
- (2) Watese inucap kengin antuk pagehan wiadin pracihna pal, saking BPN;
- (3) Silih sinunggil krama desa adat tan kalugra sakadi ring sor :
- ha. Ngalah-alah karang desa, tanah desa, tegol, carik, margi, tanah setra, tanah kahyangan lan sapanunggilan ipun;
- na. Prade mamurug wenang kadanda manut pararem;

Palet 2

Indik Setra

Pawos 83

- (1) Setra desa adat Petang pastika wates nyane;
- (2) Setra desa adat Petang manggeh pinaka setra krama desa adat sane magama Hindu;
- (3) Yan wenten silih sinunggil krama ngaben utawi matem-pung kadura desa adat patut nawur pamiut makweh ipun manut pararem (pinaka banten panyugjug);
- (4) Tatacara migunayang setra desa adat patut masadok ring prajuru desa pamekas ring Bandesa Adat;
- (5) Nenten kadadosang makarya undung-undung utawi rumah kubur sane permanen ring setra desa adat;

- (6) Prade wenten janma sios agama Hindu mendem sawa ring setra desa adat Petang patut nginutin sulur palaletahan tur polih pamutus saking prajuru adat sane mawiwit saking paruman krama adat;
- (7) Nenten dados nginepang bangbang;

Palet 3

Indik Pepayonan

Pawos 84

Indik tanem tuwuh patut sakadi ring sor :

- (1) Ngawit nanem patut adepe agung (1,5 m) ngajerowang, saking wates;
- (2) Prade tanem tuwuh inucap ngaliwatin wates mawastu mayanin kapisaga wenang kasepat gantungin;
- (3) Tan kengin wit taru mentik sajeroning wates;
- (4) Miwah tan kengin wit taru ngalintangin wates;
- (5) Prade wenten sakadi ring ajeng , wenang wit taru punika karebah tur pinara tiga, asiki katiba ring desa, kakalih ring sang nruwenang wates;
- (6) Prade wenten sakadi ring ajeng kecaping (2), wenang wit inucap kataban utawi kadruwenang antuk sang madruwe tanah sane kaentikin ngelintangin wates;
- (7) Krama desa adat patut ngawerdiang tanem tuwuh sane prasida ngawinang desane asri lan lestari;

Pawos 85

- (1) Tan kalugra papayonan ngungkulin mawastu mayanin kapisaga;
- (2) Yan wenten kinucaping ajeng sang kajerihan patut atur supeksa ring prajuru;

- (3) Prajuru patut makelingan sang nruwenang mangda papayonan punika ketotor, kapunggel wiadin karebah, sanistan ipun kesepat gantungin;
- (4) Pangalinaksa inucap ring ajeng (3), kengin matempo salami 2 (kalih) wuku ngawit saking dina saparituduh prajuru;
- (5) Yan prade mamurug kecap (3) miwah (4) ring ajeng kengin sang kajerihan notor wiadin ngebah lan sapenunggilannya, tur daging kayu katiba ring sang ngebah;
- (6) Yan durung telas waneng pituduh (3) miwah (4) sakadi ring ajeng, papayonan inucap raris empak utawi pungkak tur, mayanin, sang madruwe luput saking kaiwangan;

Pawos 86

Sane wenang keni pamrayascita sanistane, miwah negen prabiya wawangunan sane karusak minakadin ipun :

- (1) Sang nruwenang wit taru sane sinanggeh mayanin, prade pungkak ngarubuhin wawangunan janma utawi krama sewosan;
- (2) Sang notor, monggol wiadin ngebah kayu, pungkak ngarubuhin tur mayanin wewangunan janma utawi krama sewosan.
- (3) Sakewanten yan wenten taru rubuh tan nahen, manawita sinanggeh tan mayanin rihin sang nruwenang luput saking prabeya, mungging taru inucap kabukti antuk sang keni bhaya;

Palet 4

Indik Wawalungan

Pawos 87

- (1) Sahanan warga desa sane miara wawalungan makadi bawi, banteng lan sane lianan, risampun mabelas makadi banteng sampun masaluk tali, patut sayaga nitenin negul utawi ngloyok mangda tan ngarusakin karang utawi paabyanan krama siosan, bilih-bilih jantos ngranjing ngaletihin kahyangan suci;

- (2) Sahanan warga desa sane miara wawalungan mangda gumana nitenin saha nginutin kasukertan makadi ring sor:
- ha. Prade wenten wawalungan malumbar utawi ngeleb raris ngarusakin karang utawi pabyanan krama sios, risampun kawara kengin ketaban tur kadanda ngwaliang wit sane karusak saha nawur panebus papiaran tatabanan manut panglokikan prajuru desa;
 - na. Prade jantos ngaletihin genah suci minakadi pamrajan, pura risampun kaparitas olih prajuru wenang sang nruwenang kadanda mabuhu agung' tebasan prayascita, dhurmanggala utawi panca sata' iwak bebek belang kalung, prade jantos ngaletihin kahyangan utawi pura pamaksan;
 - ca. Krama desa patut nyarayanin wawalungan miwah sarwa prani, tan kapatutang maboros paksi miwah nuba ulam lan siosan punika;
 - ra. Sajawaning toyan subak tan kadadosang utawi tan yogya ngembahang toya wit badan wawalungan (limbah ternak), toyan puwaregan (limbah dapur) lan sakancan nyane, kapakarangan krama siosan, kamargine, katlabahe utawi tukad sane prasida ngawetuang ambu kawon lan ngardi palemahane romon miwah makanten cemer nenten asri;
 - ka. Tan kapatutang ngentungang utawi ngutang luwu, wangken wawalungan lan sakancan nyane kagenah utawi pakarangan krama sewos miwah kamargine utawi tukad, prade mamurug keni pamidanda manut pararem;
 - da. Yan prade mamurug (ra), (ka) ring ajeng, bilih-bilih yan wenten makoratan katukade utawi katlabahe wenang janma ika kadanda manut pararem;

ta. Tan wenang nunjel, nanem sawa yadiastun sawa karesian ring karang tegal utawi panegalan wiadin sawah;

- (3) Krama adat sane mamiara asu bilih-bilih asu sane kapiara mawit saking asu ras, patut sayaga nitenin asu punika antuk pamargi maksin manut kasukerthan guru wisesa, sumangdane sampunang jantos ngawinang pinungkan rabies sane mawit saking asu punika;
- (4) Tata titine nitenin pidabdab asu ras punika, gumentos prasida ngimpasin pinungkan rabies sane kawetuang olih asu miwah sakancan buron sapanunggilan ipun patut, kapidabdabin sajeroning ilikita sane mapituas pararem, indik rabies utawi pararem nyeje indik rabies;

Pawos 88

Tatacara Naban

- (1) Krama desa utawi warga desa sane mamiara wawalungan nenten nginutin kasukerthan sane kamanggehang saha wawalungan nyane ngarusakin kapisaga risampun kawara nenten kalinguang, wenang wawalungannyane kataban;
- (2) Sang sane ngamargiang pamidanda arep ring wawalungan makadi bawi, banteng lan sapanunggilan ipun, patut wenten sakirang-kirang nyane kalih diri tur wenang wawalungane punika kategul utawi kadedehang, kasawenin antuk tatanduran sane karusak miwah ngangge caciren sane tiosan pinaka bhukti wicara;
- (3) Salami wawalungane punika kataban patut kawehin teda tur pungkuran tatedan punika kawilangin manut pangarga sane kaputus olih prajuru adat;
- (4) Sang sane nruwenang wawalungan sabinanin kadanda patut nawur pangargan tedan wawalungan salami kataban;
- (5) Pikolih danda panabanan kapinara 3 luwirnya ;

- ha. Apahtiga katiba ring sang naban, prade karusak ring banjar utawi desa;
 - na. Apahtiga katiba ring prajuru desa utawi banjar, prade ngarusak ring banjar utawi desa;
 - ca. Apahtiga katiba ring banjar utawi desa prade sane karusak ring banjar utawi desa;
- (6) Prade wewalungan sane ngeleb ngeranjing kakahyangan, sang madruwe wenang kasisipang saha kadanda antuk panyangaskara pamrayascita manut pamutus paruman;

Palet 5
Indik Wawangunan
Pawos 89

Nyabran ngawangun patut :

- (1) Masadok ring Prajuru, ping ajeng prade wawangunan punika mapakilitan ring wates;
- (2) Ngangge gaguat asta bhumi miwah gagulak asta kosala-kosali sanistane manut patitis niskala;
- (3) Tan nyayubin kapisaga lan ngalintangin wates;
- (4) Prade wawangunan punika jantos nyayubin kapisaga, bilih-bilih temboke ring telenging wates risampun kawara tur kasadokang ring prajuru, wenang kadanda manut pararem saha tembok inucap kagubar utawi sanisthane mangda kakaryanang abangan;
- (5) Sapasira ugi krama adat sane pacang ngawangun paumahan, temboknyane atep ring panyandinge sane durung pastika pawatesannyane, wenang kawentenang paiguman pinih rihin saha kasaksinin olih prajuru pinaka saksi pamutus bawos ring wates;

Palet 6

Karesikan Desa Adat

Pawos 90

Karesikan Telajakan Desa Adat Petang;

- (1) Soang-soang banjar adat sawidangan desa adat Petang patut ngarincikang pidabdab sane prasida ngawetuang pakantenan wawidangan banjar nyane asri, rapi, ranum lan mataksu;
- (2) Soang-soang krama adat sane wenten ring sajeroning paumahan nyane patut madruwe paciringan, sumangdane wawidangan jagat druwene satata makanten asri, resik lan nenten romon dumogi karahayuane prasida kapanggih;
- (3) Soang-soang krama adat patut ngawentenang pararesikan ring satunggil telajakan paumahan nyane, miwah ring banjar adat patut ngawentenang karya gotong royong sanistan nyane ngasasih apisan;
- (4) Satunggil krama adat utawi krama desa patut mapidabdan sane dredha atuang lan sutindh ring desa adat tur nenten dados :

ha. Ngembahang toya sane mawiwit saking badan wawalungan (limbah ternak), paciringan (limbah kamar mandi), puwaregan (limbah dapur), miwah sakancan nyane, sane pacang makardi romon, bilih-bilih sane pacang ngawetuang ambu utawi bau sane kawon utawi sane nenten becik kapisaga utawi kapakarangan tios miwah kamargine;

na. Ngentungan laluu (sampah), wangken wawalungan (bangke), bacin wawalungan, miwah sakancan nyane kapakarangan anak tios, telabah, jalinjangan, tukad miwah sakancan margin toya, sane pacang prasida ngawetuang pakeweh ring wawidangan utawi lingkungan;

- ca. Sowang-soang krama adat mangda sampun sayaga nitenin saparindikan laluu inucap manut dudonan nyane makadi sane ngaranjing sampah organik lan an-organik manut ring uger-uger guru wisesa, duaning indike punika mabuat kapidabdabin mangda sampunang jantos ngawetuang polusi sane ngardi tan becik ring kahuripan;
- (5) Satunggil krama adat sane mamiara wawalungan sane ngemkem pinungkan rabies lan pinungkan sane mawiwit saking wawalungan tiosan, mangda sayaga nitenin tur mangda sampunang jantos mawabah ring warga desane, patut satinut ring uger-uger guru wisesa, sane mamurug kadanda manut, pararem;
- (6) Krama adat sane nenten satinut ring daging palet 6, pawos 90 ring ajeng patut kadanda manut pararem;

SARGAH NEMNEM
WICARA, BHAYA, DUSTA LAN PAMIDANDA

Palet 1
Indik Wicara
Pawos 91

- (1) Sane wenang mawosin makadi mutusang wicara ring desa luire :
Ha. Kelian Banjar Adat prade sang mawicara sami-sami patunggilan babanjaran;
Na. Bandesa/Kelian Desa Adat, prade sang mawicara mabinayan banjar ring sajeroning desa adat;
- (2) Prade sang mawicara nenten cumpu ring tata caran kelian banjar adat mawosin minakadi daging pamutusnya, wenang nunas tatimbang ring kelian desa;
- (3) Pamutus bandesa nenten kalinguang, patut katincapang ring paruman desa sane kasinanggeh pinaka wasananing pamutus babawosan ring desa adat;

- (4) Prade tan wenten taler cumpu ring pamutus kelian desa kengin katunasang wicara inucap ring sang rumawos makadi majelis desa adat miwah pengadilan negeri;

Pawos 92

- (1) Sahanan wicara sane mawiwit kecorahan sakalwire, miwah sinanggeh nungkasin daging awig-awig, pasuara miwah pararem desa utawi banjar patut pramangkin kabawosin nenten nyantos pasadok;
- (2) Sajaba wicara kadi ring ajeng, patut nyantos pasadok sang nunas bawos;

Pawos 93

- (1) Sahanan wicara patut pastika panepas nyane, majanten iwang patut nyane malarapan antuk tri premana;
- (2) Pamutuse patut tan maren nepek ring catur dresta (sastra, loka miwah Desa Dresta);
- (3) Sahanan pamutus tan maren ngupadi :
ha. Mangda warga desane sayan pastika uning ring wawatesan iwang patute;
na. Mangda sang kawon tetes uning ring kaiwangania;
ca. Sang molih tan maren katuntun mangda sampunang bas nginggilang kepatutania lila leghawa nyanggra sang sisip;
- (4) Kelian Desa (Bandesa Adat) patut nunasang pamutus ring sang rumawos makadi majelis desa adat miwah sang sane madruwe kawenangang mutus adat, prade wenten warga desa *amandol* ring pamutusan adat bilih-bilih yan pastika kasinanggeh ngawinang duskertan desa;

Palet 2

Indik Bhaya lan Dusta

Pawos 94

(1) Parindikan bhaya sane ketah kabawos panca bhaya ring jagate saha sane nibenan pakramane makadi ring sor :

ha. Jiwabahaya inggih punika bhaya sane nibenin jadma ring kahuripan sane mawiwit saking kabyaparan jagat makadi bancana alam utawi sangkaning kapet patinia utawi kapademang sangkaning pangrancana anak tios;

na. Arthabhaya inggih punika kapandangan, kamalingan, utawi kaicalan sane marupa artha brana miwah sakancannyane;

ca. Toyabhaya utawi Erbhaya inggih punika bhaya sane nibenin kahuripane mawiwit sangkaning toya utawi yeh manawi marupa blabur agung lan sakancannyane;

ra. Genibhaya inggih punika bhaya sane mawiwit sangkaning geni utawi api sane marupa katunuan utawi kapuwunan;

ka. Stribhaya inggih punika bhaya sane nibenin wong pawestri (anak istri) makadi kaplagandang, kaparikosa, kasangsaran sajeroning mapikuren sane mawiwit kabrahmantyan sane ketah kabawos kekerasan rumah tangga;

(2) Manut ring pakibeh jagate makadi mangkin indik bhaya sane mawetu ring kahuripan maweweh makadi :

- ha. Duracara ring agama sane mateges bhaya sane nibenin genah suci sane pinaka panyungsungan umat Hindune makadi kamalingan pratima utawi pralinggan Ida Bhatara, kamalingan jinah bolong sane wenten sajeroning palinggih kahyangan suci miwah sakancan nyane sane prasida ngawinang kareredan sradha bhakti majeng ring umat Hindu;
- na. Karipu bhaya inggih punika bhaya sane nibenin kahuripane sangkaning ripu sane ketah kabawos bromocorah, sane prasida ngardi miwah ngawetuang kabyaparan jagat majeng ring jadma, kahuripan miwah sarana urip utawi pangupajiwan sang mahurip;
- (3) Sang manggihin kahanan bhaya ring ajeng mangda digelis nyadokang ring prajuru desa dumogi digelis bhayane prasida katangganing saha digelis ngamolihang pamutus saking sang sane ngawiwenang;
- (4) Sang sane manggihin bhaya sane mapakilitan ring maling miwah kapatian mangda digelis nyuarayang kulkul bulus manut ring rupan bhayane lan mangda katedunin antuk pisarat mapitulung saha makta gagawan manut ring rupan bhayane;
- (5) Sang sane malaksana duracara ring agama tiosan ring kadanda manut kaiwangan nyane patut taler kadanda antuk panyangaskara sane mapituas ngawaliang kasucian genah suci manut pararem;

Pawos 95

Indik Dusta

- (1) Sane ngaranjing ring parilaksana dusta sane ketah kabawos asta dusta makadi ring sor:

- ha. Mamademang (mamati-mati) utawi nyayanang ring anak tios ngamademang (himsakah);
- na. Mamarikosa madasar kahyun brangti (krodakah);
- ca. Mapitulung makarya bhaya majeng ring wong tiosan (sakharakah);
- ra. Masawitra ring jadma sane malaksana jiwabhaya (prithikara);
- ka. Ngupapira lan ngengkebang maling (nyaropenin maling);
- da. Ngicenin pasayuban ring sang malaksana jiwabhaya (sthanadah);
- ta. Saruron ring sang malaksana bromocorah utawi ring sang malaksana jiwabhaya (sretah);
- sa. Ngaromba saha nyarengin malaksana smara turida (marikosa) wong istri (stryakah);
- (2) Saparira ugi sane manggihin kahanan dusta ring ajeng mangda digelis nyadokang ring prajuru desa dumogi digelis prasida kapidabdabin manut kasukertan sane manggeh;
- (3) Krama desa sane mapitulung ring sang malaksana dusta patut kadanda pateh makadi dusta;
- (4) Sang malaksana dusta patut keni pamidanda manut pararem;
- (5) Sang malaksana dusta prade wicarannyane ngaranjing ring wawidangan hukum sang malaksana patut kasuksara ring sang rumawos, prade kantos nincap ring genah suci pamidandan nyane patut kawewehin antuk danda panyangaskara sane mapituan ngawaliang kasucian genah inucap;

Palet 3
Indik Pamidanda
Pawos 96

Desa utawi Banjar wenang nibakan pamidanda ring krama desane sane sisip makadi :

- (1) Paniwak inucap kalinaksanayang olih kelian desa (bandesa) utawi banjar adat nunggal-nunggal manut dudonan sane kamanggehang;
- (2) Bacakan pamidanda manut dresta makadi ring sor:
 - ha. Ayahan panukun kesisipan;
 - na. Danda artha;
 - ca. Panikel-panikel urunan utawi dadosan;
 - ra. Upakara-upacara panyangaskara desa;
 - ka. Kanorayang (kawusanang) makrama;
- (3) Pamidanda sane katiwakang patut manut ring awig-awig, pasuara, pararem, utawi dresta miwah agama, saha adung ring kasisipan, tan maren ngupadi dharma kawelas arsan (pri kemanusiaan), pinih ajeng maka buatan ngawetuang kasudha malan desa;
- (4) Jinah utawi rajabrana pamidanda punika ngaranjing dados druwen banjar utawi desa manut dudonan sane sampun kamanggehang;

SARGAH PITU
NGUWAH-NGUWUHIN AWIG-AWIG
Pawos 97

- (1) Nguwah-nguwuhin awig-awig desa kamargiang ring sajeroning paruman desa.
- (2) Paruman inucap mangda kadasarin antuk pikarsan krama desa adat yadiastun kamedalang antuk prajuru sinunggal wiadin sinarengan;
- (3) Awig-awig puniki kemargiang ngawit kaingkupin utawi kararemin;

Pawos 98

- (1) Sakalwiring sane wenten sederengnya patut kaanutang ring sadaging awig-awig puniki;
- (2) Sakalwiring sane durung kabawos sajeroning awig-awig puniki patut kamargiang manut tata cara sane sampun ketah mamargi kadulurin antuk pararem-pararem;

SARGAH KUTUS

SAMAPTA

Pawos 99

- (1) Awig-awig puniki kawastanin awig-awig DesaAdat Petang;
- (2) Awig-awig puniki kamargiang kasungkemin ring paruman krama desa adat Petang;
- (3) Awig-awig puniki kasungkemin ring paruman duk dina Anggara Kliwon wuku Prangbakat ping/pang, 2, sasih Katiga, Icaka warsa 1940, tanggal 28 Agustus 2018, magenah ring Bale Desa Adat Petang;
- (4) Awig-awig puniki kalingga tanganin olih Bandesa Adat, kasarengin Kelian BanjarAdat saha kesaksinin antuk kelian banjar dinas miwah perbekel Desa Petang, Camat Petang, Majelis Alit lan Majelis Madya saha kapikukuh olih Bupati Murdaning jagat Badung;
- (5) Sang sane ngalingga tanganin inggih punika :

Prajuru Desa Adat Petang.

Bandesa Adat Petang,



(1) Kelian Banjar Adat Petang Kelod,
I Made Kaya.

(.....)

(2) Kelian Banjar Adat Petang Tengah,
AA Ngurah Oka Wirata.



(3) Kelian Banjar Adat Petang Kaja,
I Gst. Ngr. Bagus Adhi Sanjaya,ST.

(.....)

Prajuru Dinas maka saksi:

(1) Kepala Dusun Petang Dalem:
I Nyoman Sentiana.

(.....)

(2) Kepala Dusun Petang:
I Gusti ketut Arsana.

(.....)

(3) Kepala Dusun Petang Suci;
I Dewa Gede Alit.

(.....)

Perbekel Desa Petang :

I Wayan Suryantara,SH

Camat Petang,

Majelis Alit Kecamatan Petang,

Ida Bagus Nata Manuaba, SH.MH.
Pembina Tk. I.
NIP. 19601231198304 1 140.

I Made Budayasa.

Majelis Madya Desa Adat
Kabupaten Badung,

Ida Bagus Anom.

Murddha Pamikukuh
Bupati Badung,

I NYOMAN GIRI PRASTA

Telah dicatatkan pada Pemerintah Kabupaten Badung

Pada :

Hari :

Tanggal :

Nomor Reg :

AWIG-AWIG DESA ADAT PETANG

79